



ル 5  
3134  
15



門 儿 5  
號 3134  
卷 15

南潯志卷五十四

里人周慶雲纂

志餘五

消夏閒記摘抄詩流結社自宋以來代有之迨明萬厯間白明  
 再會稱極盛矣至文社始於天啟甲子合吳郡金沙橋李僅十  
 有一人評隲五經文字張天如溥朱雲子槐主易楊子常夔顧  
 麟士夢麟主詩周簡臣銓周介生鍾吳來之昌時主春秋張受  
 先采王惠常啟榮主禮記楊維斗廷樞錢夢林旃主書而効奔  
 走以襄厥志者嘉興府庠生孫孟樸涪也是謂應社其始取友  
 尚隘而來之彥林謀推大之訖于四海于是有廣應社貴池劉  
 伯宗城吳次尾應箕涇縣萬道吉應隆蕪湖沈崑岡士柱宣城

沈眉生

壽民

咸來入社聲氣之孚先自應社始也崇禎初熊開

元宰吳江進諸生而講藝于是孫孟樸里居結吳江吳扶九

翻

吳去盈

允夏

沈聖符

應瑞

等肇興復社其時雲間有幾社浙江

有聞社江北有南社江西有則社又有歷亭席社崑陽雲簪社而吳門別有羽朋社武林有讀書社山左有大社僉會于吳統于復社復社始于戊辰成于己巳盟書曰學不殖將落毋蹈匪藝毋讀非聖書毋違老成人毋矜厥長毋以辯言亂政毋干進喪乃身自今以往犯者小用諫大者擯僉曰諾是役也孫孟樸渡江歷齊魯以達於京師賢士大夫必審擇而定矜契然後進之于社烏程相溫體仁有子求入社堅持不可崇禎十年有蘇民陸文聲疏陳風俗之弊皆原于士子庶吉士張溥臨川縣知

縣張采倡立復社以亂天下思陵下提督學政御史倪元琪察覈倪言諸生誦法孔子引其徒談經講學互相切劘實非樹黨文聲以私憾妄訐宜罪閣臣以倪蒙飾降光祿寺錄事蘇州推官周之夔者與溥同年進士亦嘗入社至是希閣臣意墨經詣闕復奏溥等樹黨挾持案久未結讒言罔極至有草檄以聲復社十大罪者大略謂派則婁東吳下雲間學則天如維斗臥子上搖國柄下亂羣情行殊八俊三君跡近八關五鬼外乎黨者雖房杜不足言事業異吾盟者雖屈宋不足言文章或呼學究智囊或號行舟太保傳檄則星馳電發宴會則酒池肉林十五年御史金毓峒給事中姜埰各上白其事始奉旨朝廷不以語言文字罪人復社一案准注銷後福藩稱制阮大鍼怨戊寅秋

南國諸生顧杲等一百四十人之具防亂公揭也日思報復爰有王實鼎東南利孔久湮復社渠魁聚斂一疏大鉞語馬士英曰孔門弟子三千而維斗等聚徒至萬不反何待甚至欲陳兵江上以爲防禦心知其無事而意在于盡殺復社之主盟者時沈崑岡暨宜興陳貞慧定生商邱侯方域朝宗輩皆就逮係獄桐城錢秉鐙宣城沈眉生亡命得脫假令王師下江南稍緩則復社諸君難乎免於白馬之禍矣

潯溪紀事詩注太倉陸世儀復社紀略曰當天如之哀集國表湖州孫孟樸實司郵置扁舟千里往來傳送寒暑無間凡天如介生遊轍所及涪每爲前導一時有孫鋪司之目兩越貴族子弟與素封家兒因涪拜居張周門下者無數諸人亦執贄後名

流自負趾高氣揚目無先達烏程溫育仁首輔體仁介弟也心醜之著綠牡丹傳奇以誚之杭俗好異爭相搬演諸門生病之飛書兩張先生求爲洗刷西張親蒞浙言之後之學臣黎元寬元寬南張同籍聲氣主盟也因禁書肆毀版析楊書賈究作傳主名執育仁家人下于獄育仁怒族人在介生門下者爲溫以介力求解于兩張先生不許獄竟而後歸當是時越中皈命社局者爭頌兩夫子不畏強禦而婁江烏程顯開大隙矣按陸道威亦入復社其云孟樸于兩越如此果爾則人將鄙而棄之又何能取信于友舉四海各社羣彥胥來大會于吳郡耶竹垞太史云孟樸度淮泗歷齊魯以達于京師賢大夫士必審擇而定襟契然後進之于社豈獨于故鄉兩越而改轅易操耶想當聯

社初交未克家登戶至自必以友及友或間有二三貴族富兒  
 廁于其間亦所不免乃斷曰無數且曰温育仁心醜之直據温  
 氏之謠而載之矣復社姓氏錄具在斑斑可攷嘗聞温相有子  
 求入社而不可因作綠牡丹以誚之是也惟時值流寇紛攘生  
 靈塗炭士大夫既不獲達而兼善天下亦合隱憂永抱獨善其  
 身不應傾動朝野結社連盟俾小人藉口朋黨以陷害此諸君  
 子之過耳

汪志按綠牡丹與西園記畫中人療妒羹情郵記爲  
 梨花五種曲宜興吳石渠炳所作見黃宗羲思舊錄

震澤鎮志孫淳字孟樸從父履恆見名臣傳淳嘉興諸生少時  
 負詩名天啟七年與吳翮吳允夏等同舉復社時韓敬爲兩浙  
 口社淳獨與之忤失相温體仁意其黨遂具疏傾陷復社以錢  
 謙益張溥張采暨淳爲社魁疏中有網羅天下豪傑一手握定

朝權等語以觸上怒賴祁彪佳倪元璐等具疏其誣得解復社  
 實自淳首倡一諸生能奔走天下士名動至尊事亦奇矣淳藏  
 書數十萬卷著有梅綰齋詩二卷

蠅鬚館詩話孫孟樸雖於溥爲寓公其實與土著無異晚年強  
 半在梅綰居今去先生未及二百載而遺址已無人知者此可  
 慨矣茲得梅綰居存草始知先生歿於丙戌之歲在宏光改元  
 之後遺聞佚事有足以裨史冊者余獨怪青浦杜九高登春撰  
 社事始末既略孟樸之事而不言並其姓氏亦闕豈不見復社  
 姓氏前後冊及靜志居詩話耶

宋咸熙耐冷談明黃忠烈夫人手寫楷書孝經卷藏吳興劉氏  
 眠琴山館係絹本高一尺長一丈五尺二寸五分首鈐玉音清

操力學朱文長印款書右十八章三百三十六句一千八百有  
四字明忠烈文明伯武英殿大學士黃道周妻蔡氏玉卿書于  
山中後鈐蔡玉卿印潤石二朱文方印

張丹山潯溪棹歌注漳浦女士蔡玉卿故相黃石齋道周夫人

也其手書孝經卷子錢竹汀少詹大昕題詩楊秋室茂才鳳苞

跋後精審可誦子愛不忍釋因先大父奚疑公曾購石齋經傳

九種藏於家思得之以為配後友人蔣枕山炳購去亟錄詩跋

還之外祝京兆山海經行楷墨蹟黃鶴山樵山水卷子同歸于

蔣至今猶為戀戀按此卷今藏里人邱炳華家

南溟備志王毓著字元趾會稽人為諸生跌宕不羈已受業于

戴山劉先生之門同門生咸非笑之不顧也杭州失守戴山絕

粒未死元趾上書曰願先生早自裁毋為王炎午所弔俄一友

來視元趾曰子若何曰有陶淵明故事在元趾曰不然吾輩皆

聲色中人久則難持及今早死為愈六月十有二日召故交歡

飲伶人奏樂酒罷攜燈出門投柳橋下先戴山死戴山聞之嘆

曰吾二十年講學僅得一元趾鄉人私謚曰正義先生乾隆四

十年奉 旨入忠義祠甲申之冬元趾來潯上訪董若雨寓居

豐草庵張西廬孫孟樸皆與之訂交臨別執箋聯句以贈見三

人集中距殉節之時不過數月耳

吳梅蠡言填詞賓白之法素乏專書詞隱之南詞譜玄玉之北

詞譜不易購取所恃為依據者僅西廂琵琶數種而已黃九煙

周星先生云三仄應須分上去兩平還要辨陰陽可謂知言而

韻之分合尙未論及也余舊著曲旨二十卷祇源流篇脫稿他時須踵成之庶足盡填詞之難矣

九煙有人天樂傳奇惜余未之見

錢謙益列朝詩集董斯張字遐周歸安人故宗伯份之孫也少負雋才爲同里吳允兆所許長與吳門王亦房廣唱善病藥盃不去口喀喀嘔血猶伏牀枕書年未四十而卒撰廣博物志四十卷

明詩綜董遐周初學詩於趙廣業及入閩心折曹能始歸與吳允兆王亦房酬和是時公安景陵派盛行浙西風氣不盡移易遐周洽聞周見與吾郡沈景倩略同詩亦相似嘗以所作投前守吳季騮季騮寓書韓求仲云在郡兩年不識有董生吳興守眼可抉也近得渠見贈詩如飛天仙人不著一煙火字其傾倒

若是

蠅鬚館詩話棟花磯隨筆一冊乃漏霜和尚未刻稿余所見係亡友劉疎雨手鈔本其中不無參以禪門語錄於遺佚多有可取爲正其譌字存之曰庚戌住梁溪寶安寺先師在且喜閣一日隨先師至高彙旃書齋彙旃出黃石老畫卷同看有人見司馬溫公山水小幅行筆細潤絕異而石老畫筆亦前未聞但石老作老藤昏厓模糊遺墨耳又曰黃山壁庵兄昔同在研山日自敘崇禎朝廷杖時事實平時持觀音名及呪力杖一下卽氣絕後都從冥漢中過畢杖經時而復蘇所以得不死也又自指生而膚如凝酪不受觸槩庵言吾柔膚不能抵粗苧而大杖生存真不自意耳又己未風雪中將行偶寫潯上舊事數則贈紀

餘素以爲別曰余四世祖時習齋先生三字爲字亦特異性簡淡蔬水浩然與古人相酬接里人學者叩其廬必曰謁時習齋先生問字乃啟扉潑茗又曰趙長文先生言朱文肅罷相舟至吳門長翁以故人往迓纔相見揖文肅首至地笑而躍曰吾幸已歸來矣此時闢禍方赫然耳又曰耆舊言先伯父伯念先生建言歸里一日家集水竹間先宗伯謂伯父汝從都門來自有一時名賢送行文字因出呈屠赤水文軸先宗伯閱之蹙眉曰文那無結聚伯父退語人曰此別一種論文眼又曰李九我館余家時或傳其朔日必對策又得朱提遇雨霽必出曬庭中此近傳致措大風致語未全耳而閔蓑庵沈醉讀宋史登假山頂大罵秦檜之時忽促織躍出捕得之曰捕得老檜也又史鶴老

坐讀書解糗舍蔗霜而蘸墨頃之會食於堂駭其黑齒各大笑此二老爲借庵先生師友書齋中實事不同九我曬銀又曰雲栖和尚曾寓南溟豆腐橋不知尙有遺事可尋否又曰長文先生家務前門通水步翼臨流小房嘉靖年水房有孤客病垂死夜自起汲飲遇羽人從東角來澹月分形高冠雲衣隨童雙髻羽人震怒誰何病客自敘童子云師父救伊命羽人倒壺得丸藥一曰卽合水嚙之嚙之神明洞開可不死因就問稽首曰若某得再生何處訪謝羽人笑語定要謝吾吾在洞庭山王太史家中堂後來此病客如言訪之則見挂洞賓像飄飄如與藥人又曰報國寺久廢僧南林斷一臂誓還舊觀先借庵先生爲作緣起後鬱成樓閣南林者寺古名其爲字所以誓也余六七歲



時每新春及重九借庵先生必命徧禮佛溪上諸院至報國則南公出具茗果其當年斷手則腊而檀藏與余坐少頃語修復寺殿出腊手亦笑亦泣其語態至今可畫送余出寺門余苦卻之復回余詣寺及門南公輒指謂人曰此郎最畏人門送余薙染後尙健理院事沒數年爾又曰分水龍王墩龍王及儀衛像嘉靖朝名手塑如唐人畫後來修飾爲俗工浪益丹青遂不復見昔人意度可惜又曰金孝章辛亥來研山晤余涵空谷住四五日語聯絲孝章老後日抄異書見相知必問有何可抄書作杜甫乞新絲態真奇骨也夜來夢孝章立松下故作松錢詩未足一句便醒又曰八月大盡觀金粟回嘉禾石佛路上撞樓巢底漁父曰端明氏三十年來舊遊也西風白日執手長歎結矮

屋楓樹底夾路雜花花磊落幽詭不盡名麋眼籬九疊籬盡得石廊廊盡得樓容膝書畫雜陳香爐鏡奩徑寸小合大盤盂皆刻匏也巢父手自製語古今事略語文史諦視都無矜奇語匏合輒自喜明日別去贈匏種子四裹香櫟八珊瑚蕉三眼中少見如許人有二子長亦生戊寅淵厚有古骨能讀古史有千百世想不惟長謝風塵都不人間語白兆歸收齋米寫寄此段可兄弟長想見茲人九月八日堯峰細雨中手字靈壁樵事都有可紀然魯魚亥豕至不能句聊書以俟知者

俞樾春在堂隨筆董若雨說棟花磯隨筆但有鈔本沈穀臣庶常以示余字跡皆草草殆村學中童子所書也其中載朱文公祝融峯詩云我來萬里駕長風絕壑層雲許盪胸濁酒三杯豪

氣發朗吟飛下祝融峯有校者云下當作上余案頭無朱文公集未知孰是然以愚見論之作下者殊勝蓋既御風而行則搏扶搖而上背負蒼天視祝融峰轉在下矣故云飛下祝融峰也若作上則與芒屨藜杖攀援而上者何異一字之分仙凡頓別矣當與穀臣言未知以爲然否

又董若雨世皆以爲明人而棟花磯隨筆有一則云庚申二月在鷓鴣溪艇子上見陽明先生書跡念先師所許一凝字及補山堂一涼字皆書苑未發之秘舊吳釋南潛題然則此老爲僧後至康熙十九年猶在入本朝不可謂不久矣顧亭林王船山皆明之遺老而卒於本朝則皆本朝人物也董若雨亦可援此例乎考汪謝城南潯志董若雨卒於康熙二十五年丙寅年六

十七則明亡時纔二十五歲耳其爲本朝人無疑潯志列入明人是論其志非論其世

又棟花磯隨筆有一則云客有戴星叩余門云云此客出門徧告市人曰高暉生直是退財白虎余按汪謝城南潯志董說傳所載名字甚多初名說字若雨號西庵自稱鷓鴣生又稱斯張子聞谷大師錫名智齡國變後改姓林名蹇字遠遊號南村亦稱林鬍子又稱槁木林靈巖大師名之曰元潛字俟庵爲僧後更名南潛字月涵一作月巖號補樵一號楓庵又名本以而無高暉生之名此可補潯志之缺

棟花磯隨筆辛巳冬烏程秋浦吳侯謬以文字下交而俗眼爲之轉至癸未歲偶吳侯有所繩繩者富客有戴星叩余門語釋

釋不可了似欲余爲關說解之而百金爲壽者余時面發赤罵絕之曰去吾學道未暇也此客出門徧告市人曰高暉生真是退財白虎後來人都以此見謔明年客前叩門作市道語者秋遇桎梏而復語人曰白虎語有時可取

又癸歲多旱癸酉十四歲記亦無霖雨更夏秋癸未旱紙龍蟠于市市人戴雷神面具以爲祝也癸巳余初芒鞋參先師于硯山夏亦少雨癸卯夏先師在金粟余往視丈室中焦熱思雨不得癸丑在梅谿石屏山山田寶澗落如玉液也

又癸未余刻印章曰夢史又方印曰夢鄉太史後十五年先師命充書狀時假寓溪村刻潛居漏霜四字印又刻鈍榜狀元一印或見之而戲舉松雪水晶宮道人對例言鈍榜狀元政台壁夢鄉太史耳今用蕭蕭林下風珀印是先師示寂前手賜而近復欲刻四字印曰月函船師甚思船居也

簪雲樓雜說南潯董說字若雨嘗立非煙香法使百草木皆爲異香噫奇矣

棟花磯隨筆余三十年前病汗出透衣不已而心搖搖藥師多補心治不效後遇一時望者謂不用十全大補湯決死投一劑而氣欲斷幸急解疎散得蘇又歷一秋葉盡脫時遇閔持訥曰誤矣此當用越麴丸料應手而愈十五年前在研山天山閣熱疾心歷落不寧不食已幾十日沈朗中視之曰胃病也常服藥中只加一味石斛遂起又十年前患鼻塞欲嚏不可出時在茗溪歷月至木瀆尋趙封初語以病封初曰待思之明日來轉急

詢之封初曰必再隔一日定案再隔一日得藥生地白茯苓麥冬平常數味耳日未中飲煎未時初卽噉此三病三醫皆奇也董若雨舟居聽雨圖自跋石湖泛宅者寶雲自名其舟也辛酉夏五泛宅之始朔後十日漁路微雨寶雲生有舟居之癖其次之癖則聽雨也聽雨奈何聽非舟居凡近舟聽雨古聽非舟居猶動也舟聽雨靜聽非舟居雨色俗舟聽雨綠綠則涼涼則遠惟涼與綠通視於聽其微乎泛宅之始得雨而未快於聽其後雨連日聽乃大快六月住船堯峰得茗上紀子餘素馳寄舟居聽雨圖而寫石湖之雨甚悉也計圖之制則在泛宅之前五閱月矣吾聞得法妙於象外者機握其前定圖中人能聽未來之雨乎抑圖之者能見未來之聽乎必有辨晰之者下署前住蘇

州古堯峰寶雲院南潛書有白文南潛之印及朱文月函兩印記張秋水跋云此有明遺老若雨董先生聽雨小象先生爲吾鄉故家子弟丁明之季世卽棄舉業爲緇流以老州郡屢就聘之不獲見其志節可憫矣鑑曾祖母出董姓爲先生中子裘夏公女與吾張氏世有潘楊之睦憶童時值上元節至高暉堂卽見先生此象未嘗不肅然加敬今董氏出先生後者家勢日墮而先世舊物益爲灰燼是圖爲海山呂學所作上有自跋爲其弟子紀官馳寄舟居綠聽不勝浮沈身世之感圖今藏計氏秋琴館鑑嘗揖主人而告之曰此里中高士也盍善弄之翌日秋子紀官大韶所撰內有丙寅五月六日寶雲和尚示寂十三日

往哭龕下詩鑑益喜其卒事之有攷也并屬秋琴錄其詩於後  
先生棄世故後事多不見稱于人唯全謝山南嶽和尚退翁第  
二碑曰退翁法嗣滿天下而最賢者曰故大學士嘉魚熊公開  
元其後居華山名正志曰故監司宣城沈公嶽子磨生其後居  
姚江名大瓠曰歸安故諸生董說經學極博隱居潯溪辛卯之  
難寺中星散說獨負書杖策入山以是尤爲時所重其後居堯  
峰曰南潛如是而已其著錄之書甚多茲不具述按退翁姓李  
氏名宏緒揚之興化人乙丑八月初六日張鑑書於選學齋中  
圖縱約四尺橫二尺見藏馨一山廬桂氏依圖摘錄  
溫棐忱董若雨先生傳丙申秋作焚硯誓詞削髮從靈巖繼起  
諸禪師遊適三湘上衡岳遇陶仲調於長沙仲調曰吾久疑文

周彖象淆于傳注家言今讀子易發渙然冰釋矣先生曰十年  
注易千里浮湘得仲調一人知己何待後世子雲哉

鈕琇觚賸續編吳興董若雨華閱懿孫才情恬曠淑配稱閨閣  
之賢佳兒獲芝蘭之秀中年以後一旦捐棄獨飯淨域自號月  
涵所至之地緇素宗仰於是海內無不推月涵爲禪門尊宿矣  
月涵于傳鉢開堂飛錫住山之輩視若蔑如而身心融悟得之  
典籍每一出遊則有書五十擔隨之雖僻谷之深洪濤之險不  
暫離也余幼時曾見其西遊補一書俱言孫悟空夢遊事鑿天  
驅山出入老莊而未來世界歷日先晦後朔尤奇

董兆元江峰筆記家高伯祖若雨和尚挂瓢靈巖山一日家書  
至展閱忽發狂大笑一僧謂曰和尚往日得家書未嘗有喜色

今有何快意事而若此公曰吾家僅有田七畝今樵壁書來知田盡質於人矣豈非大快事

鈕琇徐伯貞先生傳先生諱鍾彥字伯貞其先世爲浙中望族元末自海鹽風山遷居吳江先生就試烏程拔置弟子員崇禎庚辰歲大饑先生硯耕之蓄稍贏有無賴族子率羣不逞者持白梃噪於門先生立出穀賑之次冬歲稔又復然先生婉諭不能止乃理於官勢以小戢越三載里盜讎起前族子爲其魁銜夙怨縱火焚廬將劫荻塘舊業先生倉皇奉母避地潯川乃免鼎革後遂屏棄制舉業方袍幅巾終其身卒于荻塘故居年僅六十有一

董說志園記癸未之歲余數有元怪夢遊感而作夢鄉志其明

年湖上虞聖民氏館靜獻授諸子鄒魯聖賢遺文謂余曰我悲夫世之車奔馬馳也而貧且爲志園願子記之余曰諾志園奈何聖民曰我園也志而已故名志園依山結屋環竹樹臨清流因出其圖示余圖如其言也余曰異哉此余所謂夢鄉者也子姑俟之余亦將爲夢樓頃余在苕溪道中夢踏雨穿亂篠俄兩山拔立如門余從門中行過松陰十里遂登一石樓樓中几榻窗扉皆石也其上有石榜碧篆七字字如飛鳳形其文曰七十二峰生曉寒今余每飯意未嘗不在曉寒也余夢樓成當并爲子記之明年乙酉聖民徵前約曰我近得桃花源圖名畫也我將以爲志園余曰諾僕采藥未暇也又二年丁亥聖民復手一紙告余曰我志園又更矣此吳憨僧巖居讀書圖也我將以爲

志園願子記之

釋方擇跋聞有潯南方山人往來淞泖苕霅間詞人也往在成壇所始一覲之則稱海印居士矣疑之今年秋翩然來山中相與激揚累月無勸元來此公別有長處一日出篋中金書童子護命經觀之蓋利世希有秘笈而圖寫精妍尤爲難得居士乞一語跋玉芝大林後余掩卷亟就居士索曰把將經來居士徐起拱而立余笑曰我從來疑汝

劉黃裳董伯念楷書金剛經跋蓋法身高大頓失須彌口藏精微才容一綫四色固乃成山五眼則名非海九百煩惱豈性所來三世推求了不可得故龍潭不見大身而支遁蓋談小品耳是知離辯乃虛空之毫樞機爲大壑之滴三十二相不見如來

而一粒粟中詎包法界邪況見而不見聞而不聞曰小曰大意何云乎不也三空無虛信無虛而無實六塵不住因無住而生心徇大者狂象之苦因泥小者肖翹之陰趣豈知以小眎大者苦不盡以大眎小者多不明何期此性本無加損何期此經自然常圓亦何以故終日金剛而未嘗金剛者鐵山也具足金剛而住持金剛者劍鋒也火山固烈焉鎔無色之金羚羊角雖堅何碎非形之石是果小因乎哉羸提居士旣見將軍之身不失童子之體爾時說義如是寫經

溫棐忱過庭節錄東林最怒浙人東之苗裔耳食前事明季結

復社吳門徐昭發先生見先子按棐忱父名滌有愠色先子談笑對之

徐未釋也後竟爲同聲之和寫山水貽先子題詩其上又貽詩

一幅皆寓贈言之意先子懸之草堂曰吾與昭發時相見也然昭發今日方知我晚矣

又明季甲申乙酉間兄公望以吾父擅文譽勸遊南雍先子以貧無資難之兄曰吾以先公入監讀書蔭與吾叔何難焉先子曰吾藉蔭入監倘不第若之何兄曰不第叔就選中書舍人可也且叔必第其勿慮先子曰第不可必是時雖欲辭不可得矣固卻之兄曰叔必不肯受叔貧吾資叔遊南雍噫先子固狷潔而公望兄之汲引扶持豈今之人所能及哉

又崇禎辛巳壬午間伯雨生以僞授旗牌事分守道路公某將置于法提卒到門伯雨生窘甚同弟千尋鴻生潛出謀于伯開美開美曰盍謀之六弟六弟先子也時讀書栖賢山中乘夜到山凌晨叩門以告先子曰爲之奈何開美伯曰吳訥如公向巡常鎮路公其治下也且有交聞路公日求所以報訥翁惟訥翁可解此厄曰諾卽往懇訥翁求救翁難之先子曰兄不救雨生斃杖下矣雨生子從兄也兄待予中表弟如同懷忍視子從兄斃乎遂泣下翁曰弟如此吾無如何矣止先子宿並留雨生開美諸伯叔是夕卽以書投路公次早先子仍至山越一日從山中歸方念此事未釋而雨生伯已于村賽中從臺上看戲先子於舟中望見之笑曰此髯而坐者雨生也事釋矣訥翁不責報于吾父吾父亦不市德于雨生伯也

又丙戌丁亥間先子結問道社同志八九人每到了日期于三日前齊集齋戒習禮祭日質明而興設俎豆祭先師贊者旁立



童子歌詩俱有儼然如在之容退而對坐輪一人質疑請問各伸所見講論竟日

又壬寅癸卯間先子避亂于南漳之洗粉兜友沈鴻載小白以事候審于司理時理官爲朱莊欽案在漳二君求緩急于先子急需若干金刻不容緩先子卽應之後無償者先子不贅齒牙也先子曰吾於乙酉孟夏之杪自留都策蹇歸宿鎮江遙聞揚州兵火聲至姑蘇方習競渡畫船簫鼓弗絕也噫廟堂旣如彼矣又何論疆場哉

又先子嘗曰吾年三十餘歲坐寶慶堂中覺得虛空粉碎此時惟有樂極忽憶尙書旅獒篇讀未竟此樂失之執友韓公蘧廬以問具德禪者具德曰此禪定之因也問大覺師大覺曰暫息塵勞又曰此樂若得餘一炷香更入佳境矣

又先子戒淫祀雖大病不禱凡遇出處患難伏魔關帝時見夢寐間乙酉夢帝謂春秋不可不讀遂謝棄博士弟子壬寅暮春遭盜先期夢帝謂爾家有破城之難時七里皆被劫吾爲爾祓不祥戊午春夢帝手畫二字問曰汝識乎曰不識帝曰十八也九月初十微疾十八午時終

又乙酉杜門後先子絕交遊吳門惟周子向先生諱茂葵忠常介公子來訪先子留或旬日半月與先子聯牀先生豪于飲飲必至夜分先子相對欣然倦則先臥踰時仍起視先生每歎先生雅量又先子嘗稱伯寶忠先生論文之言曰走得路多喫得苦多吾悔之晚矣弟年少惟精讀闡墨三六九課藝勿闕務在一氣呵

成熟能生巧名士誇多鬪靡勿取也徒亂人意耳

又先子曾與寶忠伯會文池亭一日三藝伯從橋上緩步步七八轉卽書書畢仍步無吟哦聲如是者三則一藝成矣家人以俗事告同之歸少頃來構次題三題仍步橋上如前僧或奉茶與之笑談日晡三藝完讀之篇篇精湛先子曰此熟極時也時在乙亥夏

溫斐忱長史公家傳節錄曾大父長史公諱應聘字一渠先世由長興遷烏程之七里皆隱居不仕世有厚德而公之兄弟行始以科第起家公淵源家學少負時名屢試不第始以例授南城兵馬司指揮神宗朝也陞四川鹽課提舉司提舉左遷靖江左長史尋以老乞歸能詩著蜀遊草爲同時詩家所重同堂兄

弟上者爲侍從臣次爲郡縣吏文忠於公爲姪孫輩已陟宮坊外孫吳元亮登進士入仕公於其時退然自下與與抑抑吳方伯嘗言每歲正月誕辰隨諸舅父捧觴爲壽族屬咸在公無幾微情容時詔以持盈保泰履謙守約之旨此可以見公學問之本原已年八十二子長太學生有傳次庠生子隆次上林子恆次廩生子鰲女嫁同邑太學生潘龍山守節撫孤捐千石米賑饑旌於朝有傳載潘氏家譜

消夏閒記摘抄溫璜字于石烏程人崇禎癸未進士司李徽州從知府唐良懿之策嚴城守與金聲共事

又溫璜與金聲共起聲被間事敗璜取餉籍悉焚之走山中作書留別知己妻茅氏願從死長女年十五方寐茅提之曰起從

父母女醒曰何從茅曰死耳遂束帛其頸氣未盡璜以匕首絕其喉茅亦衝刃死璜遺筆有世受國恩一死圖報夫妻與女一時盡節薄棺火葬不必還屍與地方居停無累入戶亦自剄未殊踰日以兩手碎裂其喉而死索餉籍名不可得所全實多

棗林雜俎烏程溫璜崇禎癸未進士任徽州推官聞變市棺三題曰忠曰節曰烈令妻女就縊始自經

陸心源吳興詩存溫璜初名以介字于石烏程人崇禎十六年進士少孤母陸孺人鞠之破屋一間無帷帳姑沈病且餓同坐臥一板箱種火煨芋以爲食教其子讀書姑卒孺人哀毀如子天啟七年有司聞于朝詔旌其節孝又一十八年而成進士年六十矣除徽州府推官聞國難恆引佩刀歎曰此身當付汝乙

酉六月城破先殺其女寶德次殺其妻茅妻女皆延頸就死乃自刎初名以介注名復社第一集不以兄在相位見擯於清流後禱夢於于忠肅祠夢忠肅語之曰子不當名以介宜改曰璜遂更焉著有貞石堂集事跡詳府志列傳

蔡壽昌蛻石文鈔某年月日柯家山人嚴元照于道場山麓訪得明徽州推官溫忠烈公墓所寓書來告并囑爲文記之以示來者壽昌不敢辭謹削簡焉按湖州府志公溫姓諱璜初名以介字于石號寶忠烏程人七月彌慧三歲而孤母陸孺人上事孀姑下撫弱子周旋三代苦而可貞燈火一篝織而課讀公少秉懿訓長騰英氣磷磷秋水之石落落冬嶺之松鄉里稱爲善人朋輩憚其君子崇禎癸未成進士年已六十授徽州推官銅

南漳志 卷五十四  
章甫佩金甌旋破蝮殘蟻化鼎震龍飛公乃雪涕登壇精忠激  
烈歃血誓眾聲色慨慷經略出于文章山水保其殘賸一身是  
膽眾志成城乙西南都亦覆郡守及諸僚皆遁去辭燕眇樂生  
之涕登車鮮徐廣之悲公則誠積于中確不可拔挽回天命竭  
盡愚忠生也不辰死而後已郡人金聲舉兵績溪與公犄角憤  
簿之下焚筆研而執爿血性相感率嬖稚爲一隊雖螳螂氣盛  
怒欲當車而精衛力微勢難填海未幾聲敗家居御史黃澍潛  
以城獻惟公雷霆屹若鋒刃怡然目眚一瞋背創皆裂見危不  
怯視死如歸引決全家致身一旦裹屍以革得箭鏃二升閤戶  
而經引弓弦三尺蓋城破之日公卽與夫人茅氏女公子寶德  
同日殉焉紅羊劫口蒼兕呼窮愛女銀瓶從武穆而玉碎嬌兒

繡襖賴程嬰以瓦全國殤如彼家難如此良足悲已墓今在道  
場山之陽玉鏡飛天金輪轉地墳前石馬夜半還嘶塚內枯齷  
死而猶齧荆棘不翦長過墓碑翁仲側眠時礪樵斧梨花寒食  
少麥飯之一甌楸樹叢生蔭燐火之干點莫爲之表知者殆寡  
嗟乎牛羊勿踐先生在天之靈蘋藻可羞吾黨尊賢之禮從此  
雲防霧護不愁犁而爲田筆壽墨貞敢請刊之于石

棗林雜俎湖州烏程董威故尙書份之裔蒼頭某頗饒庚寅夏  
有物空中求飲食違則見禍懼而饗之則黑氣如雲飲嚼甚壯  
屢索不已某以告威威亂後好養生家言禳以羽士俄擲磚石  
詬怒而洞庭山隱士施亮生者有道行召治之雖遁而不絕某  
乃訴之城隍神詬怒如故威言於烏程令劉璽口清執最有聲

遂齋沐告城隍曰陰陽各有所司何得縱妖孽擾民妖月餘來云  
 我求食無大罪今城隍釋我矣爾其奈我何威因檢道藏有曰  
 凡妖魅為符呪所不及治者製桃弓柳箭伺其至射之如其法  
 始絕蓋太湖魚妖也

南潯志卷五十四終

南潯志卷五十五

里人周慶雲纂

志餘六

南潯備志陳雁宕忱前明遺老韓純玉近詩兼逸集以身名俱  
 隱稱之生平著述並佚唯後水滸一書乃遊戲之作託宋遺民  
 刊行

冬心廬雜鈔大士庵後有潭頗深廣相傳順治乙酉夏有里人  
 諸生朱某自沈潭中死惜名字無攷亦未見記載不知信否  
 紀磊石齋筆記李世昌字誠謀號勝晦性簡默不苟言笑遇里  
 黨有疑事樂為辨析故閭里咸欽服焉康熙庚寅年八十邑侯  
 李公應蛟以齒德尊優額為壽崇禎辛未生雍正戊申卒壽九

十八歲

陸長春香飲樓賓談朱鬘鼻不知何許人康熙時居南漳之石  
解授徒自給徒有戴纓帽者拒弗納有識之者曰朱爲明之宗  
室鼎革後嘗舉義旗兵敗箭傷其鼻療治得不死而鼻遂鬘與  
吳翁聲庵有莫逆交每至翁家遇酒則飲食則食無少讓或設  
席邀之則堅辭弗至也嘗自請作劇以竹箸數十縱橫几上呼  
鼠鼠卽至投鼠箸中盤旋跳躍不能出啟一箸則鼠竄去謂翁  
曰此卽武侯八陣圖也又嘗剪紅紙作金魚投水中游泳如生  
撈視之則仍紅紙翁每苦暑夜多蚊朱爲剪紙人黏壁上蚊攢  
聚之又患多鼠命取空蠟書符其上鼠羣集其中徹夜無所擾  
其他戲術多類此屢爲翁選吉日逆料是日之晴雨無不神驗

翁嘗餽以銀則預書一紙示翁曰某月某日某人餽銀若干毫  
忽不爽客至或兩人或三人朱親自煮茗茗椀或浮於客數必  
有客後至人服其先知里胥來索漕銀朱曰銀已繳胥請視官  
票朱入內久之持票出則墨痕猶溼人又知其有縮地術矣時  
或他適不扃其扉有偷兒入室見千門萬戶終不得出朱至始  
釋之歿前數月自擇葬地棺衾皆預備謂翁曰吾某日當死以  
後事累君至期無疾而逝舉其棺甚輕翁爲治葬事焉後數年  
翁有從子賈於閩中遇朱於途問翁安否并道繾綣從子歸述  
諸翁翁始悟朱之死蓋尸解耳

墨溪贖墨朱鬘鼻善玉遁授徒潯北圓通庵一日謂其徒曰汝  
欲往揚州觀燈乎徒以道遠辭朱曰今夕汝止此吾偕汝行徒

唯唯至晚伏几臥朱趣之起攜手出門移時至一處鼓樂喧闐  
燈會甚盛觀畢市茶點歸天甫明徒歸家家屬遇諸塗曰昨夜  
至塾三四返汝師徒焉往語之故不信袖出揚州茶點始訝然  
沈彤震澤縣志國初吾邑之高蹈而能文者相率爲驚隱詩社  
四方同志咸集今見於葉桓奏詩稿與其他可攷者若上范風  
仁梅隱沈祖孝雪樵金某完城陳忱雁宕禾中顏俊彥雪臞朱  
臨載揚鍾俞琴俠武陵戴笠曼公玉峯歸莊元恭顧炎武寧人  
梁溪錢肅澗礎石吳門陳濟生皇士程棟杓石施諱又王同邑  
吳珂匡廬宗潛東籬宗漢南村宗泌西山炎赤溟周燦闇昭爾  
興機高撫辰其凝安安節顧有孝茂倫樵樵水朱明德不遠戴  
笠耘野鈕明儒晦復繁蓀如玉錫闡兆敏潘檉章力田以上並

見中秋對月寄懷同社詩又有吳宋北窗在瑜臞庚南杓融司  
金甌寧武葉世侗開期敷夏康哉李受恆北山王祜雲頑沈永  
馨建芳泌彥博嘉楠石城錢重鐘銘顏祁子京金始垣公觀鍾  
欽立賓王金成耳韶及繼武桓奏於時定亂已四五年跡其始  
起蓋在順治庚寅諸君以故國遺民絕意仕進相與遞跡林泉  
優遊文酒角巾方袍時往來於五湖三泖之間而執法之吏不  
相誰何 國家文網之寬諸君氣誼之篤兩得之矣其後史案  
株連同社有罹法者社集遂輟

研北居瑣錄鼎革之際土寇擾攘遠近鄉鎮悉被蹂躪我潯全  
賴董芝筠多方籌備得以無恙相傳有劇盜名赤腳張三者聚  
眾太湖嘯擁數百艘白晝東西焚掠芝筠傾裝出粟與里中紳

士召募健兒日夕警防來則極力堵禦擊敗數次盜不敢犯嗣

白撫軍范忠貞公承謨發兵數百名命芝筠參畫卒以計獲解

轅誅之湖濱始靖汪志按蘇州府志云赤腳張三盤踞太湖以

制康熙元年巡撫韓世琦抵任廉知張三與轅下材官朱允恭

者友善命邀張三宴會極歡預置長柏木桶置酒對飲倉猝間

將桶覆張三半身伏兵齊出誅之又云朱允恭洞庭東山人字

公懋富而材家有園亭聲伎之奉康熙初年長興劇盜赤腳張

三入太湖掠橫山又掠木瀆富家子置湖路梗塞莫可如何

道患之自順治二年揭竿肆擾未能弋獲湖盜事宜欲發兵

剿之允恭效力于巡撫轅門中丞韓世琦詢以湖盜事宜欲發兵

行人不敢近然好聲色可餌也請給假五日得便宜行事當

縛至轅門許之允恭訪得其黨好言說之日張君誠豪傑我欲

與交歡今以千金為壽欲保我桑梓賊黨攜金致詞張大悅約

日到山謝允恭乃盛設合樂以餉之越宿備陳女伎陰遣勇士

雜優伶中酒酣即席擒之釘其手足馳解撫轅正法餘黨駭散

湖中自此安謐允恭之功也此二條並引顧丹五筆記而事跡

互異又並與瑣錄

不同未知孰是

又時值鼎革羣盜猖獗南則花林練市烏戍諸鎮北則姚田太

湖各濃焚廬劫舍囚人勒餉在在酷虐人不安枕而潯則耽耽

虎視將闕而入也董芝筠先生不惜重資募勇士捍禦盜來誘

入暗室撲死十餘人羣盜驚愕散去不敢向潯

溫睿臨晒園別集太湖之軍起于吳易而孫兆奎等佐之其軍

為特盛易字日生吳江人崇禎癸未進士不謁選而歸乙酉以

水師千餘人屯長白蕩出沒五湖三泖間多所殺傷八月二十

四日為 大兵所襲一軍盡覆易部將茹文略餘姚人字振先

驍勇善戰少從軍長興為千夫長浙西既降文略獨攜壯士千

餘人入太湖從徐雲龍破長興雲龍死乃歸易八月之敗文略

手刃數十人身亦被十餘創血盡而仆兵猶疑其佯死又數刃



之 大兵去稍甦捧其頭而走至潯溪休于野廟廟祝見而識之曰子非茹某耶持之而泣傳以良藥百日始愈間行之長興訪母妻子皆遇害矣丙戌正月又從軍于麻湖與 大兵力戰所殺過當援絕而亡

太湖備攷按 國初太湖中最稱不靖若白腰黨若毛一毛二若赤腳張三流毒累年多來自長興山砦周禹湖營條呈所以力請專備湖西厥後諸盜以次殄滅夾浦大錢諸要口又得湖營弁兵防守截山寇入湖之路湖中自此寧謐

費之墀恭庵日記東阡沈尚書演家資數百萬無嗣以姪丙子舉人沈蔡號文五者承祧文五生四子長名始然號若士丁酉北榜舉人因科場弊已流徙籍沒而次名重熙號岸止者係辛

卯舉人又以通海謀叛斬尸於金陵舉家皆流徙籍沒兩案交并而叛案尤重三名撫蒸四名建勳又名文然欲以出繼倖免因其家資巨富遂為刁民王式舉首連累無辜在 欽案者數十百人事經十餘年三次叩 闈兩告督撫并許都御史及議政親王者律以反誣流徙始得歸結然由 特旨故再難許告耳

楊鳳苞沈簡討傳沈簡討名榮字仁叔一字塵外本姓嚴歸安石家人廣信知府正邦之孫也正邦初官太常博士時烏程沈尚書演與兄淮讀書京邸因請業焉演既貴感師恩簡討生未彌月乞為假子以云報也近詩兼逸集云簡討演之外孫韓遠簡討長而才具揮霍志節矯然汲古好學頗以匡濟自負著義

俠聲一時名士皆與之遊注名復社不以演兄弟黨閹鄙之尙  
書富甲江左及卒兄子蔡嗣而居簡討于上林崇禎之末國勢  
傾危思爲勤王之舉散財結客劍俠奇才坐上常滿當是時四  
方豪傑之士無不知有上林沈石墩者簡討有別墅在化石墩  
人因以石墩呼之事垂集而北都之變聞不一年南都又破四  
方義師麻列皆其舊識往來黃蜚吳易軍中爲之運籌而韓繹  
祖費宏璣復入郡城汪志按胡承謀府志舊聞云崇禎十七年  
璣奉劄爲參軍副使募兵蘇湖勤王六月初旬在杭州諸生費宏  
王降湖州知府王士譽遁去推官馮汝縉獻城池冊籍陞知府  
同知朱國藩加員外同城視事有總兵黃蜚兵潰其副將黃光  
志沈廣生等屯兵太湖無所屬宏璣同舉人馮爾翼及防湖哨  
官黃永錫王元徵長興諸生金攻玉等起義皆縉素俗號白盤  
頭迎黃兵于太湖閏六月初三日夜入據湖城縉爲監軍督民  
兵固守擒殺知府馮汝縉及安吉知州包灝時朱國藩以投誠

得免戰守旬日有北關外小民邱文伯改周文伯蔣理臣改周  
文叔詭言兄弟報信城外云教場一帶積尸穢氣無兵守大  
兵因架梯入城時十八日昧爽光志等皆死之宏璣分守羊角  
嶺亦死之金攻玉等退保長興文伯文叔復以功爲本府經歷照  
磨國藩仍爲同知七月二十八日攻玉等復破湖州奉楚宗某  
爲監國原任知府王士譽復出視事國藩仍爲同知奉楚宗某  
來城中火府治民居盡爲灰燼士譽復遁去國藩出降仍爲同  
知九月初總鎮張士元至金兵退守長興次年死楚藩奔浙東  
義者甚多簡討亦佐之魯王監國于東江傾家輸餉遂貧監國  
遙授翰林院簡討蔡之子重熙授御史銳欲上而 大兵已下  
越中魯藩遁跡海外居數年去監國號簡討雖竭力資之而鄧  
林之望燿矣無何李元旦御史之獄起李元旦如臬人侍郎之  
史時入中土爲間謀而之椿避亂遠遊寓家嘉興吳祖錫許因  
吳移寓湖州施鵬舉之鳥山及仁叔之化石墩元旦常往來二  
家之間有謝庭蘭者變童也與元旦雙妾通李覺而毒殺其妾  
庭蘭跳身京師驚于內府爲銀工製杯筭之屬鏤刻極精得  
召見乘機伏陳曰海中餘孽未平臣江蘇人習知海寇事皆內  
地人爲之響應四處聯絡故粹未能下耳即臣所知者揚州有

前禮部侍郎李之椿同子元旦出沒海上齎劄斂餉有某某等皆授偽職此其一也事下所司執之椿至江寧入見總督郎廷佐曰身爲前朝大臣國亡應死久矣兒子受國厚恩死亦恨晚若其所言不足信遂默不一語下獄七日不食死與元旦同戮者四十八人皆庭蘭所舉發也祖錫遁入洪承疇幕中辭連二以免魯藩授鵬舉工部主事亦幸而得脫其僕之力也辭連二沈執至江寧忼慨對簿曰五世相韓之痛夙所盟心事皆有之何必問重熙先斃獄中己亥三月簡討死于西市臨刑口授絕命詞神色不變

汪志按重熙南潯董氏之壻故王式許告連及董氏事在康熙癸卯

金之俊書南潯沈姓事歲辛卯江浙大水夏五正插蒔水勢益漫小民日夜事桔槔弗食弗息浙烏程潯鎮之南有農家沈姓者生三子年俱壯爲富家佃盡力車屏窳不能支一日告其父曰我儕生不辰值此天災流行春作旣荒秋成何望惟有袖手待斃而已死于饑死于法均之死也不如爲盜況爲盜未必死

父怒曰盜可爲乎三子涕泗滂沱跪而請曰我儕亦知盜不可爲也但見今日爲盜者不惟劫貲來家可以救死且官府爭護盜必能免死若非盜無生理矣父益怒堅不之許三子仍泣而固請曰吾父若不許我儕勢不復顧矣詞益慘激父佯應之曰爾輩旣堅決若此我不爾阻但父子天性從此死生各不相保當具酒肉爲別遂罄衣囊沽酒買肉與三子痛飲作別離狀時止有一孫在旁年甫七八歲方戀戀求一飽忽叱出再市酒來比孫市酒至則父子四人俱中酖仆地矣蓋不欲子之爲盜而死故以酒酖之又不忍子之不得爲盜而死故并以酒自酖更不忍子死竟絕嗣故詐令其孫出外市酒不與俱酖以延血祀一線也

陸圻冥報錄平望黃景範生於崇禎辛未年今寓居南潯於壬辰年二十二歲時六月十九頭覺漸眩至廿二日清晨內室閒坐忽頭中大痛卽時倒地昏暈中見一人披髮流血手持大刀喊曰還我命來有數十小兒勸解其人大呼口出黑氣如煙小兒俱被沖倒眼前皆暗忽見白光沖開黑氣光中有老僧端坐右手執杖左手持珠噉曰且住且住其人曰我受冤七十餘年今日相逢如何住得僧舉手云阿彌陀佛饒人是福冤冤相報有何了期其人曰是是奈我心放不下如今不傷他命罷了遂以手取舌用刀割去僧曰罷罷還他罷其人曰還便還且待我恨氣消遂持舌奔去僧將行顧景範曰你還認得我麼我乃當初雲栖老人也你如今不必忙百日內自有消息景範醒見眾

人環立欲言所見不能出聲以手撫口舌仍在也惟喉與胸略有空痛別無他苦至夜獨臥恍惚見一女子窗外叫曰你好睡也手撒泥沙覺徧身麻痛忽有武士持白傘來遮連夜如是至七月初一夜景範與其妻同臥武士以傘覆身上掩鼻而去但其傘甚小止可覆自身泥沙著傘上卽滾去有著其妻身上者隱隱如火光三夜如是其妻身發大熱景範心知之乃遷與伊外祖同臥武士又覆傘掩鼻而去其沙著伊外祖亦成火光二夜伊外祖亦發大熱自後獨臥武士復持傘來遮景範心想武士不知是誰武士忽曰我奉王命而來景範思不知何王武士又曰我王乃覺王手中所持悉怛哆般怛囉也又思六字是楞嚴呪心平日常誦今不知何故或者宜誦呪乎明日虔誠持呪

夜見武士持傘倍大次日又持但見傘不見武士明日又持至夜不見傘併不見女子遂每日默持病雖未愈亦無奈何因遣去憂慮一心清淨省察過愆禍福付之無心矣嘗憶老僧百日之言以自慰故終日無悶至七月望日延僧禮懺景範手書問僧云我初病時見一僧自稱雲栖老人不知何人也僧答云昔有蓮池和尚在雲栖設教因爲景範言蓮池故事景範心念之夜卽夢見一老僧身甚長大來云咄你想蓮池莫學他閉門吃飯覺來不會其故忽胸中膈塞粒食不進者三日方思食唯喫淡物乃覺安和鹽酸不能食矣時母憂景範病不愈問諸卜人云有神明作祟兼有心願未完景範思神明見咎當齋戒省過不宜殺生祈禱反造罪業至于心願別無他事惟正月初曾夢

一人云汝夏秋間有難若肯聽我書一蓮經可免此難曾與伊外祖言之欲書未果旣發心而不行亦一缺典遂擬八月初七書起至夜忽夢伊父向之流淚景範亦悲感而覺因想父被擄未知存亡景範方欲書經願歸功父仗佛神力存則還鄉亡則超昇發此願更擇十二辛亥日是伊父本命日書起限九月廿九日完乃于廿九日午後忽心痛大作嘔血升餘一時困倦獨臥牀中痛愈難忍更餘忽覺身墜牀下見一老人鬚眉皓白高冠大袖手持一杖同一僧至僧向景範笑曰什麼來由戀這苦本你如今冤債已清可同我到主人處走走可靜心聽我誦經因誦金剛經余聞經聲心痛漸減一面聞其誦經隨其行路誦完而心痛忘矣僧止步見一大屋當前門邊有一對云諸惡淫

爲首眾善孝爲先僧謂景範曰東君在內爾可進見我在外廂待又謂老人曰爾同彼進去彼已受輪迴不復自知你可求掌簿人爲他明說因繇遂入內庭庭中人曰今是朔日十王來見爾等且住俄有數人冠服執笏而進內中一人昂然挺首老人指曰此忠臣楊繼盛也已而十王皆出老人乃同景範跪階下見一人冕旒坐帳中身高丈餘面潤尺餘潔白如玉侍衛甚眾老人通說來意有一戴大冠朱衣者執簿至階下謂景範曰汝欲知因果可聽我言叫左右喚劉之麟上來俄一人至卽割景範舌者朱衣人曰昔有劉大臣號公超家世北京生於嘉靖二年父祖皆富人大臣讀書納監爲人有口辯長大多力因祖父家業復自身有才與趙文華交厚引見嚴嵩亦莫逆遂爲一方

赫赫時倭夷入侵南直朝廷命張經等往討命趙文華督師文華私邀大臣同往旣至江南大臣說文華曰倭兵甚寡若率本部兵先取之軍功可擅也文華從之大爲倭人所敗文華欲轉敗爲功乃催張經連夜進兵張經欲待兩路兵到然後夾攻不可輕進文華銜之大臣因曰不如速入京傷之文華遂入京上疏言張經玩寇殃民旣而張經與兩路合兵大破倭人南方遂平乃入京奏捷朝廷以張經矯竊軍功斬之於獄大臣有三子長子之麟金氏所生嘉靖三十八年正月生將滿月而金氏死三月繼娶陶氏至十二月卽生之寶後生之茂及長父欲爲之麟聘柳青臣女青臣欲相壻而配大臣以之麟貌惡乃以之寶示之又爲之寶聘周氏女及二子皆成婚柳氏色美而才周氏

醜惡而拙於是柳氏醜其夫之寶恨其妻陶氏性悍而智窺知  
隱情常與柳氏言之寶美麗一日乘之麟出遂於房中設酒拉  
之寶與柳氏同飲繼乃贈遺往來二月間遂成醜行時大臣知  
而不問也周氏恆有不平之言柳氏聞之遣婢送酒周氏飲之  
遂成腹痛乃疑有毒往訴陶氏陶氏素不悅之恐其將家中隱  
事洩露乃以好言安慰留房中飲酒至夜半忽以刀刺其心埋  
之牀下明日乃佯尋周氏不見遂揚言隨人私奔去了周氏母  
家亦疑其女竟不之究之寶既亡妻與柳氏日厚之麟微聞其  
風在房詰責婢女陶氏聞之乃私謂之麟曰我近日聞之寶在  
你房中走動你知否之麟言亦略聞陶氏曰此乃家法大賊人  
倫大惡這畜生雖我親生今如此不肖不如無有我必殺之之

麟受計而去陶氏又召之寶曰爾盜嫂事敗身命不保了之寶  
曰奈何奈何陶氏曰作善須徹作惡亦須徹你可特匿我牀下  
自有好筭之寶從之陶氏乃謂之麟曰你今日佯爲出外彼知  
你出必聚一處晚間卻私藏我房中至夜深我與你各執器械  
進房殺之之麟乃佯言出外至夜來到母房陶氏遣出婢女獨  
與之麟議擒之寶又將美酒固勸之麟徑醉陶氏忽扼其喉叫  
之寶曰下手下手之寶遂砍兄頭與陶氏潛開後門扛屍至二  
三里外棄在街上明日路人多來相報大臣收屍歸葬竟不知  
其繇奴婢在房走動者之寶恐其洩漏或暗中擊殺或毒藥害  
之後陶氏說大臣使柳氏與之寶成婚既成婚後家中白日鬼  
行百般作祟禳禱無應將及三年之寶年二十五矣一日有僧

手執鐵杖到門化緣柳氏素不禮僧道見此僧逐之僧卽舉杖欲擊家人奔告大臣大臣出謂僧曰你何故在此僧曰我要取一顆寶要折一枝柳大臣不會僧曰我要見你兒子大臣乃命之寶出見之寶乃謂僧曰爾到此何幹僧曰我來化緣之寶曰爾有何能敢到此化緣僧曰能消一切冤鬼之寶以僧言奇異乃引入內間之曰我家多冤鬼師能治乎僧曰治鬼甚易先當治心心爲萬類之主心邪邪至心正邪滅乃問如何是正心之法僧曰當存天理將天理人心四字明白便是正心之法又問如何作爲乃合天理僧曰但當平心已所不欲勿施於人之寶低頭半時僧曰我來化緣你若肯捨諸鬼齊休若不肯捨未有了期之寶曰欲化何物必當從命僧曰不化他物惟化柳氏之

寶曰柳氏乃我妻子如何可捨僧以杖點之寶心曰天理人心你捨不得他人如何捨得之寶大驚僧遂趨出隨出尋之已不見矣之寶乃獨坐自思深自悔過乃曰人未得道心隨境轉今偶聞僧言發悔過心倘又聞人惡言便遭沉溺矣不如到五臺訪此僧求自新法屢次欲往父母不許在家三月餘日鬼魅日盛坐臥不安之寶乃決曰今日如此境界尙不奮發一旦命盡被黑業牽入地獄豈不大悔今只宜成就正果救度二親若從一時之命苟且度日使同陷地獄是小順而大逆也遂決意欲行京西山有碧雲寺其寺二僧一曰碧巖一曰雲松二僧曾爲之寶前母金氏拜斗念經亦與之寶相識乃到寺尋二僧時碧巖已死惟雲松在乃謂雲松曰我欲到五臺幸隨我去雲松曰



爾方年少欲見明師我老矣雖死何恨遂同至五臺時有幻余禪師主化徧觀僧眾不見前僧因留年餘聞雲栖有蓮池設教乃與雲松往遊蓮池問自何來之寶備述前事且求懺悔蓮池乃教之懺悔使行苦行三年披剃乃受大戒取名大惠雲松改名大慧大惠既出家終日念佛一日問師云念佛欲何爲師云念佛則成佛又問云大惠念佛幾時成佛師曰時時可成又問云大惠如今何不成佛師云大惠如今何不成佛遂有契悟雲松死大惠獨住雲栖十餘年後至金粟密雲問曰何來曰雲棲又問平日作什麼曰念佛曰爾試念看曰已念曰只恐不是曰和尚自家不是曰尚須喫痛棒隨眾作務去後參乾屎橛未悟往黎山結庵而住直至崇禎二年聞密雲在元墓乃往問曰不

入驚人浪難逢稱意魚此語如何雲曰這里無水又無魚說什麼驚人稱意遂有醒悟回至黎山二年而死既死來見閻羅天子判官議曰少年雖造大惡終能悔悟出家未曾說法利人今去爲人有智慧而無厚福大惠言固不敢期厚福但一生出家未得大成願得長壽以成其志天子曰爾年止該五五今爾願修行其志可嘉增爲七七大惠又言我造罪累及父母害兄嫂與妻我願救此數人今不知皆歸何所願我託生得近于彼使得化導其心乃命判官告曰爾前母金氏已託生沈氏碧巖雲松已爲其子爾父大臣以平生之孽墮爲女身因金氏一緣託生爲雲松之女汝今再當爲其子陶氏受餓鬼報畢今現爲驢身不可得見柳氏受餓鬼報畢託生爲豬又生爲羊又復爲豬

方生三月因其食少乃讓與母食而自饑死土神奏聞天子以畜生能行孝道使復人身今已受女身與你尙有五年夫婦時判官言畢卽遣託生今爾身便是劉之寶善兄之時萬曆八年六月廿二日也故爾今年有此難本當身死以前生願力得免前妻周氏萬曆七年六月初七日受害舊年曾來爲禍但其受害非爾之故無深恨也你今妻戚氏前生以藥酒害他成腹痛其怨未消尙欲爲難爾兄之麟冤氣旣消亦將託生以平生有孽墮爲女身數該爲爾妹之女明年癸酉日當生爾今宿冤旣消但二十年來未曾精進今去當日自努力勿退初心莫爲名利所敗莫爲欲愛所縛莫爲意氣所礙莫爲晏安所毒言畢喚一童子取一金盒至開盒取一花瓣置景範口卽能言拜謝畢

遂問父親著落朱衣乃皺眉曰爾父死久矣景範乃言曾有二番書信朱衣曰二番書信一是你外祖所造醫生史完白知情一是爾同宗人所爲爾今回去當設靈供養休望他歸景範曰我父何罪乃遭此難今其靈魂何在願得相見朱衣曰爾父遭難乃六世以前之孽今生立心正直死歸神道三月閒陞淮安城隍矣爾但當存孝心修行正道日後得見今爾母卽前生之父旣墮女身當勸他回心向善他因前生之孽當三世墮落今始落幽主一生不暢快二世落賤主爲奴婢三世落橫主爲畜生畜生不修便有大苦不可救矣速乘今生挽回爾外祖乃生前同伴今又受恩亦急勸他回頭他在雲棲我曾教他金剛經千餘徧他往石門結願在東高橋終日誦經每至五更眾人夢

覺之初心清淨時乃高聲擊梆念佛發人善念故今生受福報得長生又其口信甚嚴故今出言有當爭訟得勝但所信不大善根亦淺年過六旬善不補惡今生受報已畢來生便落薄了又其積德不厚不能澤及後人除卻一人舉家之人皆非貧卽天爾回去教他速了自己正事無涉他人閒務他因前生信力故早年作事勝人今信根已壞爲人謀幹不但無功又招仇怨爾妻以一念之孝頓消淫業得復人身但福力淺薄壽亦不永教他急速返本免來生重受畜生爾弟雖無大成亦守家之子大略如是言畢命童子引景範出外遊行奔走如飛見罪囚數人至牢獄數處種種苦難今略存之有一人反縛兩肩膀上插一小旗旗書犯人鈕德甫呼景範曰我與爾同鄉里幸救我景

範謝不能又一姓某言我當爲豬以臨終盡心喫素一月得爲狗矣又一金某臥汗穢中言我以平生貪酒至此又一沈某自粘牆上喉中穿刀景範心發慈悲念佛數聲其刀自落又一室甚大牆中地下有刀箭飛出穿入人身壁書數人名童子指曰此陳九思在此今已出王某當入此周化機陽壽未盡未來景範曰陽人何以先書于此童子曰陰司考生人之罪當入何獄卽定其名於何獄若又造重罪更移別所若有善功卽爲削罪皆于生時先定不待旣死乃復至殿前拜辭同老人出僧在門外相待景範卽拜僧曰承師引我至此請問出處僧曰我乃雲栖大慶當年與爾同事與大淨大善同爾四人往參大智景範曰來時聞師經聲心痛頓愈此乃甚奇僧曰爾不知麼經言心

不可得何可得痛又曰此經爾外祖念成差誤又失一忍字爾何不言景範曰向不知今去當言之又曰今去當行孝道孝乃人之本心若無孝行他善雖多皆偽必不成德且神明忌淫又當除淫淫乃身心兼害若除淫則諸惡無根修德易成此二字乃升降大關頭修行起手處爾當行之然須求明師指點住深山養靜方好若在家被塵緣汨沒便自誤了世間居塵不染的能有幾箇景範曰是是我謹受教正言間又人言大師到了景範仰首見雲中一老僧端坐持珠拜求教誨師曰南無佛旁一人曰承師開示何不拜謝景範乃拜之師伸手劈頭一下云記取景範忽驚醒乃天已明所病頓忘遂披衣起與家中人說所見隨以筆記之時壬辰年十月初一日也○景範自注云諸獄

中人細訪之皆係朋友親戚恐有不便故但存其姓餘不敢妄一字又松陵錢德唯序略曰景範父瑞卿名古鑑邑庠生卽所稱陞淮安城隍者也瑞卿贅於平望徐南川家故瑞卿爲平望人乙酉秋瑞卿遇亂兵被執以南景範年十五矣號泣思父至嘔血不食南川恐其傷生僞作瑞卿書慰焉朱衣人所謂醫生史完白知情者也初瑞卿存亡景範未審而聞喪自朱衣人始南川則再來雲松是也予里人吳文可實娶景範妹卽所云劉之麟爲爾妹女明年癸酉日生今癸巳歲正月六日癸酉始立春文可果舉一女益足見其不爽云

震澤縣志順治十四年丁酉南北榜多關節中式科臣特疏指參江甯主考俱立決房考絞舉子被論者流甯古塔父母妻子

兄弟皆連坐吳江中式者四人錢威吳兆騫莊允堡吳蘭友皆在案發遣威實公取經元兆騫才士時甚惜之後兆騫允堡並以贖得復籍

費恭庵日記順治庚子七月差滿洲餉部邊蔡二人臨湖州查已赦錢糧程安二縣紳衿幾受大禍諸生中貧不能完者十之二三有同袍嚴蔚宗名書開者倡議助納各自通知親族及相好者俱驚懼大約欠銀分釐願出兩許而朱佑明助銀五百兩董帷儒助銀五百兩故得以大費成事嚴蔚宗代完又約五千金其餘衿袍總無有不費者

楊鳳苞紀孔孟文事孔孟文者字元章父爲癆醫名襟海不知何許人與湖州府城西門外郁大和者友善遂寓居焉襟海死孟文爲僧于長興弁山之土穀祠往來諸山寨中遊說於時魏雪竇爲東門令史凌祥宇贅壻聯絡山海思得一當與思溪錢纘曾允武爲密友以故孟文得交于二人後孟文盜劫一僧舍事敗二人皆薄之孟文昵一沙彌貌姣好祠之鄰近有貢生潘龍基見而悅之會孟文犯淫戒遂發其事于官知長興縣事葉文鳳責逐出境外乃挂搭于龍華寺爲堂頭元素位下知客改名雪林一日龍基至寺孟文哀之不聽復揭其短于元素以是不容于叢林遂徧于交遊乞助資裝允武雪竇以其屢敗檢也予之稍薄孟文銜焉遁至温州得海中倡義者確耗并內地通海者出入徑路遂假稱是海中大帥某某皆出某麾下又僞造一冊云儲峙屯某島士卒營某嶼戰艦泊某壘因與眾有隙脫

身來投誠是時 章皇帝初晏駕 顧命四大臣秉政鎮江將軍劉某在鎮數年無寸功方奉 嚴旨戒飭思立一奇功以自結于四大臣孟文服僧服去襟袖作馬上衣狀投劉標下劉問狀孟文言海外之難平皆因內地之人運糧餉資軍裝爲之接應耳內間去外寇可立破也劉喜卽疏題驛召孟文至京師 陸見 賜弓刀裘馬寵遇甚隆當初首告時尙圖訛詐故舛其名以錢允武爲錢雲五魏雪竇爲魏西斗潘龍基爲潘倫吉浙撫以無其人覆部時在順治十八年辛丑夏也而錢魏不知省未及行賄于孟文越半載遂易眞名注明地址行鎮浙將軍柯奎密拏矣是年十二月將軍發旗下披甲五百人掩至魏錢已先逸去僅執龍基赴杭允武跳身至晟舍閔氏留一宿閔兄弟

俱連坐瘐死于獄又至南潯朱少師文肅之孫某許遂被執朱亦坐絞雪竇遁之山陰祁氏爲邏者縛去三家俱籍沒妻子流徙次年壬寅康熙改元之二月錢魏潘三人皆被慘法死于杭祥宇坐絞復株連允武之族人价人亦論死右據潘居貞菊旃日記及無名氏湖城大獄記二書述其大略如此

楊鳳苞題河渭間集後河渭間集選十卷歸安錢价人瞻百選慈溪魏耕白衣爲之序按瞻百居歸安思溪兵部武選郎中鎮之曾孫巡撫山東僉都御史士完之孫吏部文選郎中元愨之子家世華臚少工文詞與同產弟三人並以詩名斤斤守唐法稱同調者族人纘曾允武及白衣寓公也明季數試于布政司不遇 國初郡人立孚社推爲領袖與吳磐大雍爭雄長至訟

之大府弟子著錄甚多嚴我斯徐倬兩侍郎為之冠歸安知縣吳之榮者貪而很時比之國狗之瘕以贓敗遇赦出獄豔瞻百富厚誣以屢年賦稅已所代納而恫喝之錢亦訴之上官方相持不下而是時允武白衣通書于延平為孔孟文首告之榮因搆于將軍柯奎謂其累世顯宦家富不貲連絡山海妄思噓燼瞻百主謀而二人特為之奔走耳瞻百語多不屈遂坐慘法死于杭時康熙壬寅二月也籍其家例中分罪人貲產給首告人之榮得其家之半以去妻子徙邊弟虞仲方叔丹季皆長流甯古塔三人之戍所與張坦公姚琢之吳漢槎錢德維為七子之會見秋笳集吳興詩話謂僉都官文選郎則以子之官移之父謬矣又謂虞仲父驕縱為莊氏史案株連吏部東林遺老鼎革

後灌園石隱而卒未聞驕縱史案事發在壬寅之秋錢氏家門已滅抑更謬矣

又再攷前人敘錢魏事紀年多誤全謝山雪竇山人墳版謂孟文自延平來以蠟書首告乃襲温晒園南疆逸史之誤又謂事在癸卯則更謬甚又祁六公子墓碣銘則云壬寅首告而竹垞貞毅先生墓表云二人坐慘法死在壬寅六月朔亦皆非也蓋發難于辛丑夏結案于壬寅春耳

元年六月初一日則竹垞之說似不誤

汪志按朱文肅公之孫名錫如據朱氏譜錫如卒于康熙

丁氏支譜七世有五學錄諱時庸仕明國子學錄始自吳江儒林里遷裘莊十七世夢蘭字彌高年十九父卒即點白糧解戶時當此役者嘗至破家不得已就試學憲補弟子員此役例應

南潯志 卷五十五  
優免懇于府縣不允力懇學憲糧道轉詳總漕幸而得免家貲  
耗費已不少矣入泮後益研經史與潯鎮殷价人吳恭簡董惟  
儒七里温令威令嘉友善娶潞村慎氏治家整肅嘗攜子返母  
家其子偶于地板下得古錢一大篋慎氏曰此非吾家物勿妄  
取子亦凜然不取一文其清操如此次子人傑字俊公始遷西  
柵米廊下少時寄居北柵范梅屏家有婢相謔以非禮責之婢  
慚而退一日過表姪宋某癡立道左問其故曰無以自存意欲  
投河乃委曲勸諭爲之籌資生之策其後宋亦小康云

南潯志卷五十五終

南潯志卷五十六

里人周慶雲纂

志餘七

俞樾右台仙館筆記歸安德清石門三邑之交有古墓焉背田  
面河廣可二畝餘規模雖頗宏敞而兆域久堙宰木亦盡惟河  
邊華表猶存羊虎辟邪之類皆倒於地翁仲仆者五其一尙垂  
紳端笏獨立荒煙蔓草中然陷於土者將半矣旣無碑誌可稽  
亦從無祭掃者不知爲誰氏之塋也有侵其墓旁地者往往得  
禍故相戒莫敢犯附近居民每見有青衣人往來墓域則是日  
河中必有溺死者溺人無論肥瘠一經滅頂雖卽時拯起皮骨  
僅存若枯腊然於是人皆遠徙遂成荒墟墓南里許爲某村有



孫姓者其妻携女往母家舟過墓前忽一青色手自水出大如箕攫其女入水去驚而救之則已死矣孫恨甚築土壅流而掘之至數尺無所見又年餘孫之次子與一傭者各負鋸斫草將歸矣驟雨忽至見河中一人以竹篙撐木簰而過其子私計由簰渡河而南不及一里卽至家矣乃許持篙者以錢而登簰焉簰小止容一人故傭者仍緣河岸行行數武回顧之見人與木簰俱沒於水矣急告其家孫率家眾飛棹而至鉤撈水中僅得其子之屍而撐簰者不知所之咸以爲妖鬼所幻化也孫益憤怒募術士治之一道人來應募爲壇於河之南岸方施勅勒有暴風自北而至一青衣人隨風徑撲道人道人不能支爲其所壓青衣人倏不見風亦尋止眾視道人則已扁矣流血殷然告

於官而瘞之時烏程南潯鎮有道士周靜涵者道行甚高孫往求之周閉目移時謂孫曰此物修煉千年吾非其敵須召天神爲助雖幸勝之吾亦將不免不可往也孫固請之周不得已而往亦爲壇於南岸甫焚一符暴風又起青衣人見於前曰吾大道垂成須得生人氣血以助之故溺人於河取其氣血然所溺者皆應死之人非吾故戕其生也與汝何與而見逼迫周令其遠去青衣人曰吾道尙未成去將焉往周苦勸之不聽周乃向空書符以水噴之青衣人笑曰汝修止三世不滿四百年安能治我徑前撲之周執令牌危坐青衣人不敢近而退周亦下壇如孫氏命埽除一室凝神靜坐於其中者九日復至壇所焚符而天神降青衣人出將與神敵神發巨雷聲震原野火隨雷出

其光燭天青衣人不支而遁周擲劍中其首神向周拱手入雲際遂不復見村人共見空中一物隨劍墮於河干就而視之乃石人之半面也渡河至墓域則獨立之翁伸其右面為劍斫去血流至地附以河干之半面正相脗合周書符於其胸背命掘起而碎之村人並碎其卧者而煨為灰自是墓前無復怪異周謂眾曰此物再潛養五甲子大道成矣惜其欲速遂至於此深可憫也眾送周歸南漳甫入門見一人衣冠形狀與周無異自外而入眾皆見之周曰吾元神將散矣取鹽湯飲之其人遂與周合為一後周遂多病自處分身後事臨終謂其徒曰吾為虛名所累致損元功爾等宜閉戶自修毋預外事也遂坐而化

張丹山潯溪棹歌注曹秋岳溶曾寄書張爾就肩極論畫竹遠

近多寡之勢兼及史記僮約頭責文章煩簡之法甚暢書載倦圃尺牘

紀氏族譜紀象春字汝生娶烏鎮顧氏生一子承午舊傳公有次子繼外卽帷儒董漢策也緣孺人與董母係胞姊妹董不宜男私訂抱送帷儒甫生卽匿蒸籠中裝作饅頭送去臨盆坐守旋報生男雖董氏族眾環聚不覺也既而漸洩其事因爭呼帷儒為紀饅頭云汪志按此必傳聞譌說非事實也觀董中條身未有言帷儒出于異姓者且其事既洩彰灼如是董氏族又安肯默默乎

甦庵家誠旌節先妣苦節一生實為董氏再造癸巳春月先妣傳家有序一通備述艱苦今錄于左序曰從來說道創業難守成亦不易要曉得守成的人便是創業的人不是兩種但偶然

遇著時節因緣便有創業守成不同的名色總皆苦心經營自己立身不犯諸惡然後做成事業非同草草卽如我年未二十歸於董氏時方多難尙書老爺棄世已久三代科甲盡皆捐館此時只有先衿母徐太太在堂汝父又多病只好靜坐不理家計太太暮年好靜不能十分照察倉廳所遺田產大半消耗典中剩本不過二千金中間掛空號的又大約有小半屋租零落不堪朝夕饔飧不繼又有三種大弊其一太老爺規矩已失家裏人盡是放肆的不肯遵守約束況且主母老家主病全然不看在眼上呼之不應畧一整頓便一齊反噬此一大弊也其二如太老爺勢力大了各處小百姓未必歡喜且家裏丁少相公叔叔不過兩三人支撐不來外侮頻起委實難當此二大弊也

其二向來人情世法不能減省卻是屋裏空空的無錢無米竈下日用又多每日燒柴也費百十斤此是虛空架子手下人偷去也用度如此太多日日無饜分文不進如何度日此三大弊也我到董家來恰好頂這箇苦頭拋又拋不得做又做不來難熬難熬我只得勉強支吾將從來三弊漸漸消除家裏人要他守法外邊人來欺侮的可忍則忍不可忍便情願棄性命破錢財與他作個對頭其餘柴米費用之類務要覈實不必用的多省了如此做去方纔腳根站在實地上卻又不幸汝父因屢科不第鬱鬱病痼日夜長眠飲食不進我因董氏式微汝父之病關係非淺早起卽侍坐湯藥之類焦心勞思不曾一刻得空晚間同眾等圍坐看守服藥無效便去求天拜地鬼神禱祀之事

無一件不做了以後幸天憐董氏病漸平安繼嗣復生多是天助絕而再續我復苦心朝夕侍養汝父卽有病患自家也不及愛惜又要料理家事指揮童僕風吹日炙我多不顧豈不苦耶其中又有福未享而禍重生之苦天啟三年幸生一子冬間便遭大故衿母徐太太背去內無主張外無倚託兒幼無知只得寄養在先姊二房太太處喪事粗畢賊黨又生徐柳奸人搆通偷盜忽然拋磚爲號殺入臥室細了汝父又燒又搶我只得攜汝避了室中所有一旦罄盡且外無救援盜黨公然出入天平天乎何苦我至此耶無救也罷還有從中生事的說道盜在家裏將以不好名色加在我身上我只得呼天求救務要擒賊雪冤此時虧得汝外公及長白太公閻卿雪因兩舅一力擔任捉

了賊併捉出徐柳纔頭見官見府問成罪案方得表明了自己苦心小小報了仇也不意寇網汝父驚駭病深從前癩症至此復發更覺不好我也只是丟性命破錢財求醫求佛要救汝父遷延不愈竟不見好吾此時另立箇主意說道父病子在便是根基大約病者不可復起我只看得兒子長成便是好結果了卽將一片用心費力求天拜地的肚腸安放在教子一節上去也兒自襁褓中多病我惟恐不濟事積些陰德務求長大成立光揚祖宗做箇頂天立地的漢子汝父病深渾不省事古玩打盡書畫焚盡玉器金飾之類全不照管託人管了盡皆偷賣或將假的換了又兼屢次失盜家傳精華大抵盡失我也總不關心豈是不值錢他只爲有了兒子萬般皆在譬如我自己布施

了也如此自己譬喻過日可憐可憐汝既出世我便思一頭好親事做箇外助其時惟有吳門申宅是我家舊親文定相公又是先太老爺的門生遂憑媒妁定婚申宅幸而青翁二老叔頗肯照顧也完了我一點念頭向來兒漸長讀書就傳我惟恐讀書不出又恐獨子驕養先生不嚴空過時日又恐體弱過勞讀書成病喜得三件俱不礙十歲後勉力借債思量爲汝行禮納采只是自己力量不及耳歲在壬申夏間三房旌節李太太見我向善苦修婦道兒又聰明決非凡品遂有立嫡耐食將家產授我之意一言已出爭者四起同宗骨肉爲這幾分銀子便同仇讎一般你也來奪我也來奪奪得落得此是如何景象我想起來三房家產我又不是貪圖他的分明是太太好意以繼嗣

爲重立嫡立賢也無差處我如何忍得卻又思量這般氣色一箇女流如何抵敵得住況且凡人以情義爲重錢財爲輕我不妨退讓一分便大家一團和氣豈不快樂爲此只是靜守憑太太分付眾位尊長均分便了不幸命薄太太又仙逝去矣孤身無倚全沒幫助汝只曉得讀幾句書全然不解我的心事虧得有至親閔唐李沈諸位老爺從公分派漸覺內外大小俱無閒言是年冬間忽遭汝父長往之慘痛切肝腸我不能身代幸得喪事苟完家業亦定便勉力揭債借了王店盛宅千金爲汝行了聘後汝亦入學卽勉力爲汝畢姻亦補了廩在士林中有些浮名我只望汝中了便完了我心念也數年以來偶值荒亂成名一事至今未遂我只朝夜以望今世界亂離我只有一子若

汝出仕我何所依縱然富貴我也提心弔膽不得安甯故功名  
二字我也斷不以此責成於汝幸喜天助善人孫兒繞膝雖然  
目下靜守前來正未可料可喜也可喜也但是甲申以來國家  
多事南潯小小地方寇盜日夜暗算我是女流豈料命運不好  
在這箇劫裏只得母子相依外邊的事汝能撐架裏邊的事我  
自補湊乙酉年秋間生死只在頃刻幸汝努力不至破家冬間  
遭了大盜劫掠南邊三房太太所遺當本盡失內房舊存物件  
也被劫去丙戌一年流離遷徙刻刻在刀鎗裏過今雖粗安我  
只是體不貼席也從中力量我道是全憑上天福庇我因此發  
心持齋奉佛此是我身親經歷的豈不自省我做人到這般田  
地受了千辛萬苦雖是只得這幾畝田產幾間房屋卻是我一

生苦節做成的卽此皆是我一生心血也較前初到董家的時  
節僮僕也將就守法外侮也將就安息弊耗也將就改正我也  
算得不負董家的人了況且汝又長成行年三十汝父雖得汝  
能繼守書香外邊的人多須我不失苦節又贊汝能養老親施  
恩佈德才畧優長學問充足雖未好許汝果然全備或者能不  
失一二也未可知爲是我卻放心了兼之我老且病因前日伏  
侍汝父時喫了風霜把持家政時受了煩惱體中日漸狼狽飲  
食減少風痰常發雖賴汝醫藥不到得衰憊卻也覺得費力我  
若只管擔這重任我也忒苦了我今只要皈依三寶念佛養靜  
做箇在家出家的樣子擇吉已春將所有家業交付與汝汝可  
靜守哲訓體我苦心不必固辭此卽養母第一事因我年老欲

圖安靜況從來做事英雄皆從磨鍊世故裏面打磨出來卽此  
管家理事多是英雄學問也我自聽堂前田畝以供朝夕禱定  
奉佛閒居自好是我之願汝有孝心正不必在飲食孝養上見  
卽能一朝擔任撐持得門牆或者運至時來有箇出頭進步日  
子便是眞孝也汝聰明倜儻不是等閒人能識時觀變見人春  
風和氣自然無人怪汝只是每事疎懶不肯細密恐有小差失  
處我常憂念然青年有志只未曾精鍊所以是這樣若一加用  
心自然是不忝所生的人但願積善降祥以後子孫茂盛家業  
興隆讀書的功名早就操家的精神強固不爲世運所淆不受  
他人欺誑教子成名書香繇遠榮親顯祖奕代賢仁便不負我  
一生苦心董氏昌盛有期矣

又世間固有不可解之事自非親身鮮不目爲誕妄者如我一  
生所經歷癸未閏羅之夢甲辰元天之夢無不歷歷奇驗諸如  
此類奇兆甚多卽兩次在茗禾祈雨尅期霑足皆無心得之雖  
事出偶然亦一奇也倘載入稗官後人必指爲妄矣 余在童  
齡見諸大家宴客所用瓷器大不過三徑寸久之漸移今且大  
如缸矣食器愈大而家愈貧於此可以見風俗之日漓也今諸  
大家雖極貧而奢靡如昨我不知所底止 我嘗欲構別業于  
居吳漾畔奈未得善地耳不必多構但仿孫真人退老記便已  
足此地北望洞庭兩山門外一泓好水漁釣最樂 屋租盛衰  
亦有氣運前此壬辰癸巳之交屋租頓增我同支加租至三倍  
我念薄德卽此賃房人與我比鄰而居我不能施惠何忍加租

耶所以自壬辰至今悉照原數不改先大宗伯一定之額也至於續置房屋租額畧重則又遞減七八折甚至五折不等汝等無論盛衰但守故吾睦鄰恤佃是亦一善行歟 宴客用優人登場賜坐或尙在通融呼之同坐角飲則褻甚矣今人敬優兒如師友殊令人訝卽不與之坐不過曰不在行而已天下事被在行二字誤卻多少

江峯筆記先從伯怡庭公舊藏先徵君小像數十幅每幅後有徵君親筆題識一展閱間徵君生平德業風流宛然如見惜題識大半脫落不可一一攷究余恐年遠并所存者或不免散失因敬錄數條俱照徵君手蹟不敢妄易一字其殘蠹者缺焉 秋七月苦旱余方靜息評史記守道李公遣人從禾中齋書來

請祈雨余勉赴之李公欲建臺如世俗法余不可時禾中有羽士熸定華夙負聲譽余請以折簡招之登臺行持余惟行靜功於城隍廟之玉閒沈子商節昆季吳子寅工皆在座首日微雨三日雷雨作余卽辭去時七月十九日也禾中諸老留宴余力辭之乘風揚帆歸沈子序夏輩岸上追躡招余暫留余答之曰再停七日則川澮皆盈吾不必留也序夏爲之悵快而返至二十四日果連日大雨慶霑足 余於二十年前曾囑潘逸老徧拾遺骸埋藏普陀塔矣歲久遺骸更多遂呼莊奴船役給以錢米走荒郊殆遍悉歸義塚焉時壬子春正月也 自雲棲還會城卽遊大滌山山故有洞霄宮宋時最盛殿宇宏麗傍分七十二齋皆羽流居之歷代仙去者如郭吳葛許諸真人皆潛修於



此山勢環抱原名九鎖最近一關馬不能方行相傳宋孝宗略加疏鑿以通輦道于是真氣洩矣殿尋燬諸齋盡頽廢不可問口有孫善長鍊師寓此志在興復而資力未辦僅葺無塵殿并方丈數楹而已余過此慨然念之其地有青檀山天桂宮伏虎巖來賢巖撫掌泉白鹿山房金口口虛皇壇九曲齋翠館齋黃茅山藏書巖大滌洞諸勝余爲賦詩記之大滌洞中有石如雲扣之如鼓亦一奇也歸返蓮溪休息不越月遂結友溫子叔口張子懸渡巖子兼山皇甫子大立及二三羽流溯口航茗溪重至洞霄宮修真武讖法七晝夜時枋兒隨侍亦與焉讖期中二虎守門靈旛自結圓期有月華之瑞感夢元天遣二神護行且似有愀然不樂之色殊不可解越一載北行遭難始知奇應也

向聞水月老人名云年已百五十歲所云皆奇驗余初未敢信王子之秋謁范大中丞詢及老人本末范公曰數十年前曾相晤於關外言無不驗壽踰百五十非妄也余始信其真是年仲冬七日偶以督葺萬松書院艤舟聖湖與潘子受公沈子聲紫鷺坐話潘云昨見水月老人問起居再三盍往晤言耶余遂以次早乘肩輿至石岫門但見茆舍三楹在桑林曲水間遲許久老人乃至啟戶入室如漆次第開牖天光始來奉佛一龕繩牀無枕被以麻鞵爲枕褥懸梁上已塵封矣老人與余分賓主坐顏甚恭惟言天下將亂蠻王如某某皆將揭竿起又言范公將入閩不可不留余見其言語參錯似無倫次者意頗訝之老人忽曰溥中蟲災余答云幸不至甚老人曰子莫欺我溥自某

至某縱橫可六十餘里有人保奏頗有收子何諱也我雖伏處環堵常至天上誰能給我者余爲驚服蓋九月望後曾命羽流修懺保蟲災老人所述自某至某數言則余青詞中緘閉語無人知者吁可怪也老人曰子將來有人邀同入都此不可不去余遂具陳有薦牘我方固辭不欲去也老人啟戶送我又撫余背曰勉哉不可不往余遂別去還至湖湄晤曹秋岳親翁云有沈逢吉欲至潯可同載否余唯唯肩輿先至水次少頃逢吉至薄暮小飲逢吉忽言水月所言之奇中余詢之逢吉備述吳梅村先生周子儼窗兄二事余不覺吐舌天壤間固有奇人如是哉逢吉云余于十九歲時見水月其時已年九十三今我年六十餘屈指計之水月老人當是百四十五歲也 三吳固稱澤

國民尤苦澇歲在庚戌夏五中旬風雨傾注不三日而田禾盡淹阡陌俱失一望巨浸農夫號泣閭閻駭懼於是州邑申請蠲救撫軍范公由杭禾越平望將至潯余曰此當今溫鄭也不可往籲遂駕輕舸至梅堰登公舟而扣請焉公曰眞奇荒矣有何法可採余曰田不得種米從何來請蠲漕米庶有瘳乎公曰朝廷定例祇蠲條銀十三漕米係官府必需豈可請蠲耶請更思其次余曰莫若改折米不可得銀猶可典質求也但昔歲改折每石幾及一金如此則民益困奈何公曰舊額平米一石內有耗米三斗有奇今旣改折則耗米無所用之祇折正米民或可生乎余不禁手額曰如此則湖民幸甚但刻下民無粒粟可炊則死在旦暮老弱填溝壑少壯爲盜賊深可慮也公曰爲

之奈何余曰有明季萬厯年間朱文肅公救荒條議可採用也公曰今安得此書時余已預覓一卷遂出諸袖中公大喜曰是勝于百朋之錫矣方展閱頃余曰朱文肅公所言平糶法可行也權那藩庫并勸當道義助若得數萬金則遣幹員往楚豫糶米不過四十日米至矣減價平糶往返數次客米多則本處之價日減民必慶重生矣且計楚豫之價必賤今至浙縱價量減猶足還庫官亦無損也公曰善請再言其次余曰本地之米不可得請行糶糶充漕又須從民自便不得限定用糶恐至冬糶貴民之求糶更難是兩困也故曰莫若從民便公曰善余曰再請開援納事例富家勸助則難強也許其援納則米自出夫旣糶楚豫之米又開納粟之令則米有盈餘然後議賑散米設粥

皆易行也公曰吾今日聞讜言當力行之矣時舟已行抵溇東關余方起辭公曰今晚至茗願明午來茗會眾紳衿公議也余唯唯卽辭歸次早疾馳入郡諸先達俱集天甯言人人殊余復晉謁時公定議改折平糶糶諸法已定集眾不數言萬姓歡騰焉是夜余宿于沈氏盟鷗別墅有中表吳修之窗友溫全思在座甚言吳江之苦江城宛在太湖中水溢沒縣署街衢行舟而催科未息江民有不遠數百里來號呼於浙撫者余爲惻然次早再謁因具白其狀公曰江民呼號吾亦念之其如疆界何余曰地界雖有江浙之分然百姓孰非朝廷赤子今溇之東偏卽江邑也相隔一脔浙民何其欣幸江民何其慘戚惟公熟籌之請將現行事例咨江撫可也公曰善會公將還省余送至

碧浪湖有江民數十人具呈呼籲公卽收呈去時七月初三日也越四日余隨諸先達至省謝始知疏已入 告且移咨江撫由是江省改折福被數郡矣 辛亥春正憲行設粥廠賑飢百日余謂若欲賑飢須先覈飢民戶冊遂囑昆季子姪同里中耆民至各圩查訪果有塘長圩甲得錢妄開之弊極貧無錢者反不得與于是召集鄰佑口自委悉刪去冒濫增補極貧開寫真正飢民冊每人發竹籌一根爲憑遠近無不悅服矣縣所發米祇賑十七區僅有一百五十石廣爲勸募併自助又二百餘石猶恐不敷余卽具呈於守道李公請將烏戍原佃唐氏房屋抵司那領所糴楚豫之米五百石每石七錢算該紋銀三百五十兩道詳院允行于是米數充足然後集昆季子姪耆民設廠于

潯西祇園寺擔柴運水皆吾家僮僕也先期竟夜煮粥質明殆盈十餘缸飢民旣集照籌發粥日晡而盡散凡五晝夜執事者皆目不交睫余曰嘻憊矣再更數日諸君殆將耗耶是法難久行盍少變諸況飢民得粥祇可充一人飢腸彼盡室罄罄將何以存活余請改賑粥爲給米每五日一發掬米而去一家皆飽民其甦乎遂草條議暫停施粥命子延枋星馳至省謁撫軍進條議范公溫顏相接極贊其當且曰非尊公無此卓見且非尊公之無私亦不能行此法也批允行縣給示枋兒歸縣帖已至廠矣于是改爲賑米飢民十人爲一班東進西出驗籌發米有重來者子姪輩卽察出咸驚以爲神不知照數有籌照籌有冊縱極狡詭亦無能爲也十七區施賑已周尙有餘米縣帖行給

十六區又有餘縣帖行給二十區于是載米舟行至于烏戍事畢余謂飢民已賑彼一二貧儒何以自給遂同眾友公開姓氏人給五斗守道李公允詳速行士民均悅是役也告竣結算共發一千八百餘石云越一載司催那借之銀三百五十兩家人甚困于徵比歲底始得解此五百石皆余家捐助也賑米甫畢至郡報竣寓於沈園之敞閒堂草條議十數條時與李子雪塢溫子令思同寓每書一條余摘紙尾朗誦李子溫子咸擊節稱善議上范公採行十之六七開吳淞濬吳江長橋等事皆條議所陳也撫軍范公莅浙一載餘頗以激揚爲事適奉恩詔求賢將以賤姓名玷薦牘余具呈於藩臺袁公固辭藩詳撫得免余喜甚爲賦詩曰豈余輕組紱薄好在湖山拂劍星臨檻

聽泉琴滿關干峯當戶出一鶴破雲還獨坐無餘恨浮鷗對我閒時已酉冬子月也余于壬子九月具呈辭薦袁藩臺不肯轉詳卽呈院力辭又不批行十一月旣望叩轅請見具述謝才應聘有五不可少壯猶不如人今老矣筋力旣衰何以經營庶務一也學問淺陋無以備咨訪少所記誦今盡忘之應制摠詞空疎貽誚二也南人不能使馬孱質豈勝馳驅三也賦性疎傲不曉諂曲諧世無術必招怨尤四也家事衰落薄產祇充餽粥耳空囊無以應酬五也所以再三固辭實有斷不能應命者非敢飾說也中丞公大不悅謂以人事君人臣之道前歲薦葛世振辭不赴今公又辭是使我無以對君上也聲色俱厲于是余不敢再陳退而與同寓李子雪塢王子震生言之咸爲惆悵

于是泛舟東歸發故篋重輯諸家易解曰知進退存亡而不失其正其惟易乎吾且註易終老焉其可矣 余既堅辭不允癸丑春日齋咨以行道經金閭與皇甫大立胡子柯星家書田姪夜飲於寓樓諸子或言此行將盡抒抱負矣余曰否否余於秋間必歸與諸子重歡讌於此耳遂賦詩一章中有纁帛羅英賢宏綱布春暉朝野固異趣達人觀其微行且返初服貞心託漁磯綸釣有秋水衡門無是非與君共酌月抗言說先幾諸子咸異之既至都門再賦兼懷大滌山居其詩曰未必胥靡慰夢思卻來京雒望旌麾銅龍日照螭頭轉朱鳳雲連豹尾移心在清江煙艇遠書藏元墓石牀迷拂衣歸訪茗源水一笠庵中鍊五芝蓋前歲至大滌于方丈東偏有數椽余擬棲息于此顏曰一

笠庵故云四月二十五日到部卽具呈力辭當事不肯收呈至五月朔旦引 見四鼓起未黎明進 五鳳樓過 太和殿東同眾官候靜鞭進至 乾清門吏部大僚以次啟奏凡引 見各官唱名跪中道但聞傳 旨云一二不用看可令回去候旨遂隨眾官出金碧喬皇日麗五色仰而睇俯而思曰是夢境也退而賦應 制詩十二韻曰龍轡天彩曜金支旭日初浮五色時雲影遙隨旌影動鐘聲還與珮聲遲 彤墀靜對開青瑣紫闈傳呼啟絳恩風度寶輪聞 帝語星分 御仗展 皇儀 楓屏姓字求賢切祕檢敷陳報國奇案有黃封瞻政肅 廷無白簡識 君慈徘徊 闕下同鷓鴣晏喜寰中息鼓聲繁 縟禮 堂不遠遐荒俗異 聖能知坤乾已見清甯候放怠

曾師虎豹姿諏訪崆峒唯論道旁搜宛委更摛思霞明 宮殿  
韶光轉花壓周廬瑞靄移朝罷從容歸 左掖幾回珥筆集  
瑤池越七日奉 旨以科道員缺試用同人或稱賀曰此豈夢  
境耶余曰凡境皆幻不旬境又將變矣 五月十一日繕本至  
通政司投進固辭不口懇收投云須懇吏部代題次日至吏部  
又不收呈月之十七日方操本重至通政而蜚語與臺參交至  
矣初發吏部圈審犯又奉 旨落職發刑部身羈犴城處之晏  
如賦秋士微吟四章以見意研審再四身嬰三木再駁再審終  
無他辭幸荷 皇恩昭雪于七月二十五日出獄至寓同旅中  
諸子小酌賦詩曰今夕知何夕春回第一宵酒螺含沆瀣蛩嘆  
奏雲韶安國仙源遠更生封事遙 恩波難測量渤海望秋潮

此後餘生孰非 帝德耶 自淮揚至清水潭觀其塞決河數  
百金置一埽丁夫架空斷絕埽入波漂如輕羽間有人與埽偕  
墮者口湧沈洪流丁夫金錢俱盡焉少進至淮乘野航渡余曰  
不過月餘淮河將如溝下流江渚閭民其漁乎齊子曰何故余  
曰河爲濁流淮爲清流淮力勝則清濁相當併入海今清水潭  
決則淮水之清流不能敵河水之濁流反是內地夫河水一斗  
中帶八升泥水帶泥來填闕淮河日增月長故淮河將如溝下  
流江渚水勢漫散畎畝陸沈自然之勢也齊子稱善余爲賦金  
隄行以紀之 徵君學貫天人生平以諸葛武侯李鄴侯范文  
正公自期待救荒諸策略見一斑惜出山旋返不得展其經濟  
耳然始之辭薦與後之辭官固有不樂仕之隱衷非常情所能

窺測也晚年尤好道時俗所傳神異余不敢盡信其可徵者有小像一幅徵君道裝與二三羽流共立石壇上昂首望雲霄間有白鶴數十二翔舞不下相傳徵君能召鶴洵不虛矣惜題識脫落未詳在何地也辛未仲秋二十七日曾孫兆元謹識 又一幅奇峯突起壁立萬仞上插霄漢下俯洪流峭壁上有洞五洞內一兔一船一杵曰一几几上有爐一橋橋上有人其數三似皆石鑿又旁一峯峭壁上結屋數椽皆非人力之所得施也水中有石矗起上有小石塔徵君駕輕舸獨立船頭恍欲仙去恨題識亦失無從考其境地也

范忠貞公文集范承謨檢舉疏云臣入京陛見蒙皇上諭臣靜養調攝復遣御醫李玉白診視療治竊冀宿疾稍瘳勉効犬馬嗣因遵奉京察典例具疏自陳私揣有過無功病多才短應在罷斥之列乃過蒙聖恩包容寬貸令臣仍赴總督新任臣捧讀溫綸悚媿交集正擬謝恩陛辭卜日束裝忽接閱邸鈔見有臺臣甯爾講指參董漢策陳其忠一疏奉旨該部嚴察議奏臣不勝惶懼慚慙之甚以漢策乃臣之所薦也其忠又臣之所參經督臣劉擬絞援免者也憶臣於康熙八年四月內准吏部咨開議覆臺臣徐題爲恩詔之頒行已久賢才之薦舉無聞一疏查康熙六年十一月內恩詔內一款地方有才品優長山林隱逸之士著該督撫核實具奏酌與錄用欽遵頒行在案查各省督撫迄今並無具題相應請勅各督撫地方查才品優長山林隱逸之士實堪採取者卽行具題等因通行到臣臣以浙省爲人



文淵藪豈乏應舉堪用之人或以前地方官員視爲具文未知博訪旁求以致久虛盛典臣心不勝怏怏比卽嚴檄各屬虛公核舉隨據甯波府以葛世振應湖州府以董漢策應而漢策堅不出山未列薦剡世振又旋以老病懇辭已經部覆議允至十年十一月又奉恩詔漢策復經鄉里公舉司道府縣勘詳其揄揚之詞溢於筆楮臣猶謂大典固不可虛薦舉亦無容率諄令復核必公必慎而各官又備列生平通相保結且稱其曾經前撫臣秦世禎按臣杜果等相繼推轂殷殷勸駕而漢策廬墓山中不卽應詔一撫一按歎賞褒嘉言之鑿鑿及臣察驗水災按部吳興爰訪里人有謂其素履無愆者有稱其拯災賑貧德及里閭者秀愚童叟一口同聲臣聞見賢而不能舉者慢也聞人

之善而疑者薄也國家方懸纁帛弓旌之典微臣尙爲索瘢求疵之行則以人事君之謂何況既有府縣可據族黨可憑臣又何容一概以爲莫可信而察察爲明也今其忠所許雖真僞有無事難遽定但旣人言之嘖嘖保無墮行於冥冥臣不敢以急於求賢之隱衷飾其闕於知人之顯過乃臺臣疏中以薦漢策爲臣瑕臣滋懼矣又以受人之欺爲臣惜臣益滋媿矣懼與媿并臺臣之爲臣寬解者愈甚臣心之慚惶者愈切又安敢違心文過而妄思倖免也伏祈皇上勅部嚴加處分立賜罷斥以爲冒昧薦舉者戒

董漢策訪菊篇小引二十年前張潛庵寓潯水之北余嘗過其齋居玩菊後遷戍上潯川之菊荒矣丁卯九月訪潛庵於太樸

山房欲觀黃花一寄諧焉適逢七表遂賦贈之

南潯備志金梅字次調震澤曹村人嘗館于董氏南江先生其高第弟子也與紀白雲先生交尤深集中唱和最多著有夢草集丙子詩草擊轅集各一卷董氏門人鳩而刻之紀先生爲之敘

莊斗草壯子金窵青曹村人有道術一日至吳江時大旱兩縣請崇正觀道士召兩道士啟曰曹村金相公適至此可延致主壇渠符呪甚靈縣尊大喜卽親訪其舟邀至署中意甚殷窵青啟曰水旱天意非人力可爲今兩縣父母果能屋漏不愧清心寡慾齋戒上陳爲民請命庶幾精誠所格可以感召天和若僅小雨乃符呪所爲耳縣公因請小雨窵青曰此易事卽用黃紙

畫符向燭上燒之紙灰盤旋繞出簷去漸高漸大遂變成黑雲一朵頃刻大雨淋注階下水驟深半尺雨止辭去問之城外則雨無一點云或鄰里有暴病毒瘡癰疽窵青往往以符救之立愈鄰有一女被產厄死窵青按其胸微熱急命取水至以箸攪水念呪畢命飲之初滴入口卽活動再滴之病人面脣青黑立退再飲之則張目開言曰好滋味是冰蜜耶飲盡則病全退矣從伯楚望言窵青遊京師二十年遇異人授以術遂能役鬼神召風雨後相傳時時以術爲戲發狂病死

按窵青名澳居潯

紀端先君子餘素府君行略先君原諱永成字遙集一日大韶平日所師事者二人一爲吳淞西廬張先生一爲鷓鴣溪寶雲董先生西廬先生踵王宋之後以理學爲己任先王父亦山府

君暨先君子感受業焉年十七喪王母嚴幾于滅性事後王母張以孝聞二十歲後習弓矢之業然性非所嗜在菖中嘗以詩請益於呂半隱先生潛歸家與湖濱僧香谷雲舟刻意唱和古文則正於孫商聲先生歲壬子范大中丞承謨主浙闈試獲售先君子治易寶雲書河圖存三字以贈注云紀子學易沈苦將返吳中雨中書此以爲券先君子至京師者六旋去旋返以王父春秋高不忍離也嘗著北行記南還記備言山川風土之致而旅邸之思風霜之感亦復三致意焉寶雲以爲似盛宏之荊州記寶雲夙稱書藪其所評本先君子時時手錄不下數十種如左傳提史記脈二本鈔凡三次至寶雲歿後懼其遺文散佚窮四日夜書之兩目眵昏手腕幾脫矣

孫履元談鱗廣惠宮三清殿西向其南粉壁一版繪一仙人高可尋丈狀貌秀偉左執楊枝右持一珠俗傳仙人楊珠自繪其影也余攷楊芝錢塘人善畫仙佛鬼判特長于尋丈大體愈大愈妙西湖天竺寺壁觀自在像是其筆名芝不名珠亦未嘗傳其爲仙也唯殿壁屢壞屢修此一版乃歸然經久不壞亦可異也其北壁一版向爲尹西村錫畫劉海蟾與之相對筆亦飄逸今已壞矣或訛以爲楊朱像遂并指北壁爲墨翟像尤謬

胡承謀府志錢武舟字濟亭歸安人孝友樂善不事表暴康熙四十二年南潯姚某負客債陷縲縶將鬻妻以償武舟傾囊助之且轉貸以足其數後其人訪求率妻子踵謝則揮手弗顧其全人骨月完人名節多類此

蠅鬚館詩話潯上陸氏有士潮士渭者棣萼連科可稱嘉話然  
 文采不章遺篇無述近閱凌進士保釐瓠息齋集有病鳳謠小  
 序曰爲建平公舅祖作也公氏陸名士渭庚辰進士以建平縣  
 知縣罷歸余少頽放不爲親族知識獨公獎借過當於其病廢  
 謠此以唁之能識才士於未遇之先可謂差強人意

南漳備志城壕上殷价人先生維藩官四川峩峩知縣赴任時  
 道經一僧寺小憩偶抽架上書閱之乃制藝稿本凡先生生平  
 試卷鄉會墨並在其中駭問寺僧云其亡師遺稿也先生悵然  
 自悟僧卽己之前生自此忽忽若有所失抵任月餘卽病卒  
 瞿源洙笠洲文集黃九烟先生名周星江寧上元人其先爲湘  
 潭人崇禎庚辰進士榜姓周名星後復本姓卽以周星爲名先

生父母貧甚賣腐爲業與周氏鄰富而無子先生始生卽爲周  
 氏所撫弱冠成進士不自知爲黃也周氏父母相繼卒忽有瞽  
 婦詣門呼先生小名曰汝本吾子先生駭甚婦言十數年來漂  
 流異地夫亡矣子女皆盡無所依倚將藉汝終老焉因具述昔  
 年與周氏授受狀且曰抱汝至此者某媪也今尙存可試問之  
 先生呼媪詰之言盡合於是持其生母大慟而復姓爲黃時人  
 多詆先生忘周氏撫育恩其後生子一承黃氏一奉周祧外議  
 稍息慶雲按汪志寓賢傳先生終周氏父  
 母喪經理弟妹婚嫁畢始復姓歸宗甲申變後先生隱居  
 不仕屢往來吾宜從默齋湯先生游默齋勸之講學先生曰吾  
 負不忠不孝名何學之講耶一日先生曳杖獨行至宜鐵廬潘  
 公遇之荆南山下鐵公吾嘗爲之作傳所稱潘孝子也時持筆

囊相隨行各通姓名縱談交相得遂為先生負擔從之往吳門  
 訪徐昭法昭法名枋壬午舉人父汧崇禎時官至僉事江南潰  
 父殉節昭法將從死父止之曰汝可不死姑為徐祧薦飯人昭  
 法遵命奉父喪葬訖託迹一茅屋伏處荒村中先生及潘公至  
 叩其扉昭法未老幾失明矣又餓不能出戶庭強起揖客既相  
 見則抱持大哭時日暮昭法不能具燈燭盎中絕粒已三日矣  
 先生解囊貿米數升鹽少許共炊作糜食訖令潘公獨臥旁榻  
 兩人聯牀對語數聞哭泣聲夜過半兩人皆作隱語潘公靜聽  
 之多不可曉達旦又痛哭而別康熙庚申年有以博學鴻辭薦  
 先生者先生避之湘潭有司又迫遣之先生嘆息曰吾苟活三  
 十七年矣老寡婦其堪再嫁乎遂自投於潯陽江而死慶雲按先生投

南潯之閘濤閣橋下非潯陽江也

默齋先生哀之為作輓歌曰九煙先生胡為

者深忠至孝俗所駭又曰不死甲申死庚申不貴黃金貴毛裏  
 蓋以雪先生不忠不孝之謗真實錄也又聞先生於鼎革後家  
 亦貧甚以授經餬口一日館於某宦家以貧而無諂題命諸生  
 作文主人嘖蹙曰開首第一字即言貧不願聞之先生大笑束  
 裝辭歸是年閨中即以是題較試主人始大悔復邀先生先生  
 卒不往先生又嘗自名黃人字略似號半非道人

南潯志卷五十六終

南潯志卷五十七

里人周慶雲纂

志餘八

蠅鬚館詩話鑑曾祖姑有適歸安縣之花林茅氏名健思之長子佑昆者不知於明鹿門先生何屬也茅湘客譔絮吳羹多采茅氏之詩言元銘字鼎叔著名復社以貢宰朝邑為史禍株累死者數人子弟多遠引有兄之子名兆汾字巨瀾號遜邱實鹿門先生曾孫也曾仕至參將因棄為僧名今漸居匡廬晚始改服歸里又言鹿門先生長支六世孫有名吳耿者隸籍吳中曾應江南乙卯鄉試已得首選時三逆方煽動拆卷駭棄亦異事也吳耿子名星來字豈宿號遜叟舉業外兼長古文辭入都謁

方靈皋少宗伯一見賞識累薦衡文名遂大噪幾致千金竟老死牖下尤足惜云鑑按遜叟先生與高暉堂董氏有中表之戚晚年多厲豐草庵與先伯祖悔修府君亦締縞紵之歡

紀氏族譜紀養浩字毓昌攻時藝不屑趨時故試輒不利然矢志彌堅髮已種種猶逐隊童子而無倦意郡城葉方伯佩蓀方申角時公應試常寓其家見方伯攜書就塾邀與講解無不了了因以神童目之決其必成大器既而方伯贈君以家貧欲令改業商之予公公力阻而勸之學逮後方伯成名感念玉成之德曾執弟子禮登門道謝

阮元兩浙輜軒錄王標字匯東號立齋歸安人仁和諸生

吳羹詩選范少司空約齋先生與予少同學爲貧交嗣後雲泥

關絕者二十餘年迨返初服卜居潯溪造謁仍如平生歡因得晤其快婿龍湖王君君英年績學揮塵霏屑知其腹有詩書先生乃屬出吟稿相質雅健雄深殊不類少作因亟錄之

潯錄少時讀董若雨棟花居隨筆見孤客遇呂仙事每豔稱之比長謁朱心裁先生則曰若知鎮上有鄭某遇跛仙事乎試爲子述之其言曰乾隆初鎮人鄭姓忘其名於中市開布舖每於夏初往蘇之木瀆鎮買秋莊二門發販計潯至木瀆水程約百四十里有奇輒蚤起步行至瀆投行置貨借宿次蚤便船發貨身又步歸十數年以爲常是年四月鄭囑所親守店自懷元銀十錠東行一路花香鳥語比戶蠶符頗稱幽適晌午道遇跛丐軟語同行疑之詰其所往以木瀆對心念孤客懷金深虞比匪

因急行丐亦急隨故爲緩步丐亦躑躅不前益怪之丐亦先知  
舉杖示曰木瀆卽在前矣視之果然急趨就輒隱現不常而日  
薄西山鄭漸窘丐復笑曰金烏西去會見玉兔東升何害未幾  
天暝鄭惶恐丐慰藉旋見皎月騰空急望東竄又數十里足繭  
神疲少憩丐出數棗相餉食之甘美不飢因詢曰往日傍晚輒  
到茲行何遼絕也則又指曰夫獨非木瀆耶締視不爽乃復行  
數十里月已西斜忽見木瀆近在隔岸因思嚮時到瀆從未隔  
河喚渡何忽有此則見對河有廟廟後來六七人招跛丐丐因  
勸其越澗鄭駭甚不聽則激之曰爾不超越吾乃從此逝矣勿  
後悔鄭堅執不可丐乃一縱過河同對岸諸人招手呼鄭鄭復  
不從乃見數人俱向廟後去不復見急回顧則石壁森立高與

天齊再視對岸人廟俱失而水則江天浩淼一望無際不得已  
步回山徑崎嶇非復向時平坦又數里山空壁豎虎嘯猿嘯鄭  
益心悸見道旁有一青石大可數圍疲極而憩跌坐待旦比曉  
尋路山徑羊腸幾十數里始見人間之語音喞晰不可辨隨之  
而出又數里見一茆屋乞筆硯問地名則四川峩峩山也鄭爲  
之舌撝不下者久之徐訪至城市以銀易錢急問歸程行至湖  
南金盞路遙行乞而歸方屆揚州經一閨闔有人倚門而望詢  
之曰君非南潯鄭某耶待子久矣鄭以素昧平生方疑訝間僕  
從延之沐浴更衣出則盛筵相款詢其故曰寒家素奉乩壇今  
呂祖降臨示詩未悟同人叩問乩書君名云與君有舊令某延  
訪鄭曰久溷風塵未嫺吟咏奈何出詩視之茫然也而羣致疑



南澗志 卷五十一  
者以驚了二字鄭曰此西吳鄉音卽蟬也伏天清音聒耳交秋  
漸澀諸人點首稱悟飲畢爲買舟送歸贈以二十金至家則旅  
費所餘僅懷十金而秋露桂零寒蟬聲咽矣鄭自後心慕元化  
不知所終心裁先生余內子之大父也係徽國文公長子塾後  
裔好古工篆隸余見時年六十餘劇談移晷厭飫舊聞惜其時  
方攻舉業不暇致詢也

蠅鬚館詩話晟舍凌保釐先生樹屏作孝廉時嘗居南澗故其  
疥壁集小引云余生遊歷不出數百里外丁巳春偕計吏北上  
始睹江淮天塹之險燕趙虎都之雄書鞭作賦畫墁成吟郵亭  
舍館淋漓殆徧然頗爲逆旅主人所厭惡身未去而聖漫者往  
往而是明年棲跡澗南復不自戒圍屏坐幄之間殊多粘綴亦

安所得碧紗籠乎因并其兩年所作署曰疥壁以志余媿

南澗備志凌樹屏著有瓠息齋前集二十四卷後集若干卷其  
寓澗時所作爲疥壁集入前集內瀛最愛其貞志賦序因附錄  
之序曰國初宏詞諸公率據漢唐注疏以抉剔朱子集傳近時  
學徒頗有沿竊其說者余爲正告之曰諸公皆先讀集傳後讀  
注疏彼其少年識力旣無得於此驟見漢唐人訓詁分趣別解  
輒振奇之因欲以其名物器數之學奪我義理偵矣余則不然  
由名物以求其義由器數以通其理先注疏後集傳窮流溯源  
反約於博遂覺朱氏精醇有非漢唐人所可及者旣以語諸人  
退而作此賦云云議論平正抉明以來學者之通弊故君之及  
門多高才生旣無空疏之病亦無攻擊之習蓋先後之序得可

合漢宋爲一也吾潯陸大令嵩高亦其一云

潯錄夏冠東明府少嘗夢登一大家樓看屈突通傳後贅于徐氏登其樓似曾遊者抽架上冊適得唐書屈突通傳見明府自著夢嚙編

紀磊南潯詩錄姚景燾字存之自號愛蘭仙子少習舉業後棄去專嗜吟咏與弁山僧慧卿及吳雲村鳳鑑鄭靜常念榮潘柳村爲莫逆交居西芬草堂著愛蘭仙子詩草十二卷

蠅鬚館詩話潯之詩人舊有謝散木洲姚蘭仙景燾兩先生其後人均與吾張氏有嫻嫻之好謝本籍餘姚來潯才及五世詩五言特蕭散真造宋元諸名家堂奧蓋散木先生爲紀白雲高足弟子其爲白雲先生傳曰茗雪之間有白雲紀先生者諱遠

字子深又字白雲世稱白雲先生姚江謝洲年四歲時卽識先生三年從之授唐詩五年先生教授他方後三年復從之遊又五年乃止而先生亦隨沒先生幼奇慧見賞於西廬張先生雋豐草董先生說後從西廬遊盡得其讀書之法年稍長煜煜有文名屢試郡縣輒冠其羣一日試于有司而先生已醉矣凭几熟睡傍晚猶未覺友人急呼之乃操管疾書文不加點及發案遂爲第一人由是奇之後連不得志于主文者南走閩北走金陵數十年始補縣諸生而年已老矣散木又有姚亦山漫吟詩鈔跋曰余與兄文少居潯上時有詩友二人焉一日王蕙如一曰姚亦山蕙如富才情廣交遊對客揮毫一時傳誦亦山狷介自持閉門覓句不肯輕示人惟予兄弟及蕙如得盡讀之亦山

居新橋予居明月橋相去百步許每日相過從坐綠陰下啜茗論文見日西亭亭便有憂色抵暮送至橋下悵然而返後予兄弟歸姚江蕙如亦讀書吳門亦山瑩然獨處孤燈風雨四壁蟲聲唧唧寥落之況可念也頃予復來溇上亦山詩益平淡由武功長江而漸進于右丞蘇州予于是讀之而敬其人也已而將歸因盡錄之附以蕙如倡和諸作以爲海上吟詠資并以示吾兄文少也亦山卽蘭仙之叔其詩集予未之見

南溇備志王蕙如先生起鵬官陝西清澗知縣偶出門輿夫顛蹶墜輿先生怒歸呼輿夫杖之輿夫怨曰山路雨滑非我之過今杖我不亦冤乎我甘殺不甘杖也卽出小刀自剗其腹死先生驚駭卽刻遂病抵暮而卒

溇溪文錄董翁連城家私巨萬人稱長者有明經紀翁方出仕時以膏腴十畝囑中售於董議價百金時同里富翁沈豔羨此產則曰若售於我倍價可得董曰若果肯絕我何難加倍因欲便贖就董百金紀久宦歸來田疇日闕忘其故業忽一日省起而中已故語其子曰曩時尊人介紹于董許我找價百金爾盍爲我取諸聞者愕然默計事經二十餘年時價已浮如何致詞然不敢違命竟造董門直陳前說董始而沈吟旣慨然曰我與紀俱望九之年難得兩人具在豈可食言竟兌百金不必書契遂持奉紀翁紀翁曰我固知連城不爽約也人稱直諒忠信兩翁有焉

溇溪文獻吾鎮西莊邨吳氏世爲諸生傳家嚴毅於里黨間正

色直言少年佻薄之士每懼憚之吳子本初喪偶纔三旬餘耳父正平詰之曰爾思續絃否答曰一聽父命因語之曰我家貧士俱館穀于外若新娶一妻必需一二童婢便增食指且爾有男有女不娶爲是本初唯唯而退特時方強壯陽氣正盛眞火上攻徧體瘡潰頭內作唧唧聲蚤起櫛髮每一梳下宛如數百螢火墜地舉煤點著此眞奇事而其家孝友承順可知已

紀氏族譜紀用思字我揚爲王九牧館甥九牧精痘科有起死回生之效遠近奉若神明以無子業傳于壻公得其祕授亦屢著神驗然當日如嚴雲衢爲潯上世醫九牧有姪大聲其馳名尤遠過乃叔公出而與之鼎峙究以醫非世業不免三舍之避逮雲衢大聲相繼早逝始翹然獨出舍我其誰一時口碑遂有

嚴王去了紀當頭之諺

善田張氏族譜張鴻案字載熙善丹青兼精術數乾隆庚申服賈遠出不還子星椿星樞四處尋訪杳無蹤跡星椿嘗祈夢於于忠肅祠夢見大紅繖一柄歸述所夢孺人泣曰繖者散也恐不能與汝父復聚矣鴻案竟不復返

履園叢話李石渠先生名殿圖嘗官福建按察使少時祈夢卜科第夢神語之曰遇亨而通不解所謂乾隆乙酉中式北榜出劉侍讀亨地房丙戌會試盧文弼薦中撥入紀太僕復亨房夢始驗

景星杓山齋客譚杭州有爲人代庖者齋銀千兩作二酒甕由蘇喚舟以達南潯蓋防窺伺也旣至牙家主人曰此處猶慮盜

耶盍啟封以畀我獲啟皆磚石也先是舟經八尺風猛舟輕舟人取磚石以鎮舟次早有草舫掠舟而過舟子呼曰王伯伯有衣包在曷爲我寄於家至是代庖者執是一端以證盜舟子百喙無詞焉訟於官徧毒桁楊無所承幾半年所舟子日禱於神以爲冤以其寄物見疑無或出者臘除歲改矣而案寢冷貨主人疑焉叩於司案吏吏曰子之代庖者所命也貨主人并代庖者訟於官盜始白蓋代庖者豔潯牙之富將以愚之而漁其金不謂潯牙幸免而舟子以取石寄衣之巧合而卸禍焉幾蹈不測人心之險如此哉

淮陰百一居士壺天錄雷殛所以懲惡也而於忤逆不孝之子則尤不可赦中畧浙湖南潯鎮有某老翁者既貧且鰥生二子各

授室輪日就養二子素忤逆朝夕饗殮嘖有煩言翁負氣出門謀食他方逐逐奔馳無所餬口悵悵而歸二子皆不納惟幼媳暗爲留焉分羹以餉翁忿甚一日潛行不歸竟投於河二子以失足沈溺草草殮斂斂畢雷電交作震死二子一媳惟幼媳獨免云中畧夫烏鳥返哺羔羊跪乳禽獸且然人子旣不能養且逼以死禽獸不若矣其遭天譴也不亦宜乎吁可畏已

潯溪棹歌注故淮徐道若愚潘氏於大街營建居第時因在任所俱令其僕經營而僕復以其餘貲於藕河坊另建住宅內有柏木花廳楠木樓未幾潘敗俱入官後來承佃者寶善堂徐氏轉售者尊德堂張氏俱以富豪稱不數十年皆衰替零落折毀殆半

香飲樓賓談蔡三南潯人飲博無賴貧不聊生與比鄰朱廷煥善朱亦浮蕩共謀竊近寺銅佛鎔鑄小錢獲利甚厚忽兩人有隙分財各營生理蔡以銀貸於人取倍稱息家日以裕而朱日事游賭所蓄蕩然時挾前事告貸於蔡誅求無厭蔡慮其終爲己害欲殺之而未有間會除夕風雪遇朱於青華觀前復牽衣求助蔡忿起抽佩刀刺殺之委屍道旁而去朱旣無親屬鄰保鳴於官官來驗視命盛殮而已初里中有譚小貓者貌姣好蔡以變童蓄之比長命司會計是日蔡歸譚見其衣有血漬驚問其故蔡以實告且戒勿言當爲爾娶婦遂以血衣命之湔洗譚諾之久之責償前約蔡不得已出數十金爲娶婦婦甚美蔡自納爲妾而許譚以別娶譚怒揚言欲發其殺人事蔡患之伺其

睡手刃之顧自念殺譚必獲罪因寵妾而憎其妻遂誣妻與譚私并殺妻自首於官官不之罪妻兄弟廉得其情控縣及府蔡俱以賄免乃訴諸撫院中丞某公前夕夢一婦人被髮浴血跪於庭似訴冤狀詰旦閱其詞忽憶前夢檄縣捕蔡至省訊以刑盡吐其實兩案並發乃雪婦之冤而置蔡於理

攬茝山房漫記王鶴野善制舉文屢薦不售尤工於詞深得梅溪竹屋之音己酉往謁王蘭泉方伯於江右道經樂平之鷺塘避雨於定香僧舍門庭恍如素厯一僧熟視之曰子貌何酷似我師耶因歸作鷺塘行腳圖徧乞同人題之卒以不得志困厄而歿詩詞遺稿叢殘無次其甥周東帆以增刊詞行世爲我友張秋水明經鑑輯選也

又紀治夫少無外慕讀書敦禮乃習形家言名著鄉閭復善琴奕每遇風日清佳坐小蓬萊一彈再鼓怡然自樂客至或煮茗高談相對一局勝敗兩忘先是明嘉靖間其族祖泉石公鉞有宋刻棋枰曰小蓬萊棋局後失去爲餘素先生得之作文記事見餘素齋集久復失之治夫重價購得之壁還如舊因顏其室小蓬萊館云

談鱗廣惠宮隔岸某氏空屋素多鬼怪白晝窗戶每自開自閉故其家曠弗敢居後有張姓賃居之見竈前有石版甚闊疑其下有異發而視之則鐵索懸一朱漆棺其中更無他物急掩之迄不知何代何人之墓也

潯輯吳興會館在都中宣武門外戴服塘先生璠記畧云吾郡

會館創自乾隆戊寅先是少司馬吳眉庵先生有捨東井書屋爲館之議其後人以宅售于他姓鄉人欲贖而未能也維時宮允孫約亭先生都諫嚴桐峯前輩同心規畫賴有長蘆董芑堂運使慨捐三百金迄以少司馬故宅尙隘別購一宅於北半截胡同時中丞閱峙庭先生方伯葉辛麓先生方官郎署其落成焉余於己卯入都鳩工甫竣館在街西東嚮大門及門左右屋七間其中爲堂爲南北廂堂後爲室有廂如堂凡屋二十有三間館之南有隙地若干步丙戌少僕紀心齋前輩比部吳桐村先生倡議募貲增築屋十有七間南嚮於是館益開拓而規制未備余於庚寅司事始立鄉會題名王子不戒於火南廂被焚他屋亦爲救火者踐踏殘毀余亟致書中外爲修館之計而許

春巖方伯首捐二百金屬同鄉同宦粵東者王君謬胡君鈺陸君來范君桂孫君登禾蔡君羣捐俸寄京遂於春闈前刻期葺事且爲移改大門清理庖湏增設牀榻夫然後賓有如歸之樂按記中所云董芑堂紀心齋吳桐村皆潯人也攷宋文肅公集有會館條約序略云會館古郡邸之遺也明興二百四十年各郡森列我湖缺然宦者應舉者薄遊者挾貲而商者徭踐更者初至茫無著足有之自今萬曆戊戌始任事釀金爲泰垣沈膳部協貲爲伯南春渠陸沈二春元奔走效力爲慕庵嚴君而先十年創議立簿則二岑茅侍御與膳部均有草昧之功云會今春在京者最多而湖人素集玉河橋橋之東有休甯故館彼謀舍舊而我圖新價亦中等一媾遂成旣成諸君立約刊書以示

後是則明時本有會館不知廢于何時也

戴璐吳興詩話吳學使巖字懷峰號桐村烏程南潯人辛酉舉人仁和教諭以巡撫匿災白諸學使雷翠庭師據以入告撫軍落職丁丑成進士官刑部久不得遷賦落葉詩八首沈東田及余均和未幾晉郎中主試貴州視學山西所拔多名士善飲工繪自題山水詩多清絕終養來京卒于會館蔣太史蒼生輓句星節雲司懷老宿詩壇畫本弔神僊公于添建會館落成賦環字韻倡和盈壁在西曹修律表龍臬使承祖梓行

吳氏族譜吳巖字懷峰號桐村東閣兜人工繪事自題山水詩多清絕先是桐村之姑適吳江八角亭子港曹氏生子數月來歸寧後回家抱子便旋於河溺焉懼舅姑責復返於兜而以病



告夫家須緩歸桐村時亦生數月貌類曹氏子遂以桐村易之其舅姑莫辨得相安於無事旋復本姓歸烏程籍考試

志稿嘉興錢籜石先生載嘗舟經潯溪小步市上遇雨避入新橋臨水一肆中肆主見其戴紅風兜怪之又以其久坐不去頗形厭侮先生不校也及雨霽先生出肆歸舟去其風兜而冠上紅頂見肆主駭愧亟詣舟謝過先生酬以餅餌笑遣之蓋當時鄉風淳樸初不知紅風兜爲貴官服也

耐冷談昔年權學景甯與烏程紀蔚巖豹文同官蔚巖人極方古子病百計扶持至夜不解衣時將七旬腰腳甚健登山猶不用杖也爲詩不假思索出入誠齋放翁之間

蠅鬚館詩話吾師計魚計先生發向倡落花詩八首一時和者甚眾惜不可收拾唯帆下錄曾刻其原作數首今仲子秋琴慨其散佚復繪爲圖以徵一時題詠而錄其原倡於前和者只崔問波先生珊一家問波與魚計師爲中表昆弟以諸生遊幕嶺南幾二十年歸時年纔五十餘余館劉疎雨畫扇樓中日相過從暇則仗鈔書而送日手鈔書數千卷居家僅十稔以中壽沒遺書零落可慨也

潯溪棹歌注乾隆時有邱癡者寓廣惠宮測字晨出暮入嗜酒無日不陶然也信口侈談常多奇中有問病者得杏字答曰杏杳冥冥象入幽陰十八丑刻方知字靈果然又有二人自鄉間來問病而邱已歸寓因往叩之適有犬隨入因述其故嘻曰死矣更何占詢之則曰兩口而加一犬哭字已形速歸辦喪事吾

將飲勿溷乃公爲也未出門又有人來言人已歿矣乃驚服餘不勝載

談鯖吾溟紀氏藏一巨甕其底可以旋轉而注水未嘗滲漏每有吉凶事將至甕輒吼某年忽大吼而秋卿第災甕亦爲人攘去驚諸温氏温歸張氏後紀與張爲婚姻始以舊物送歸未幾羣兒戲于室誤碎甕口其後遂不復吼矣

又廣惠宮毛道人嘗有數友邀與作吳趨行辭不往迨諸人至吳門則道人已先在因偕游虎阜支硎諸勝留連數日諸人先歸歸告其徒以道人留吳之故徒曰師固未嘗出也因相與叩其卧室則道人笑而出迎矣蓋道人固有道者

幽華詩略董肇鑽字豐玉號霜岳沈柳橋云董肇鎰字依堂著

菊盈編霜岳之族兄也先霜岳卒詩已選入湖州詩錄逮鄭柳門封翁選刻續錄列霜岳詩不載其字與號及詩草之名似有疑爲前後一人者所幸鑽字未誤猶可攷異柳橋留心南溟文獻信而有徵故附及之以俟後之攷證者

范鎔感逝吟小序方蒸砂老人初名堂字升矣休甯人少游桑叟甫先生調元之門以副貢例選直隸曾署玉田縣事丁艱歸遂不復出縱游江浙山水間晚寓南屏之淨居僧舍改名塘字問渠號蒸砂老人余於乾隆丙午晤于湖上玉立長身修髯飄白媿媿譚詩興猶不淺越歲扁舟枉過南溟余館之于長生古刹留月餘而返後聞其家迎歸新安無復音問矣

楊鳳苞秋室遺文余里有沈氏某宦閩之侯官愛小胥范貴攜

以偕歸某子服未練夜開宴召優伶給事貴卧牀不應流涕曰  
貴死矣主人之喪在堂而燕樂乎又聞人王大槐者與范同隸  
于沈以哭母嘔血數升死

錢大昕竹汀日記過南漳鎮晤劉疎雨觀所藏書有宋槧本張  
九成孟子解廿九卷後缺盡心一篇其滕文公篇許子必織布  
然後衣乎有小民之事與光堯御書本正同金陵新志前有至  
正三年南臺御史索元岱序張鉉字用鼎關中學古書院山長  
前載文移稱浮光張鉉則光州人也劉一止茗溪集五十五卷  
無序跋係鈔本又聖宋名賢五百家播芳大全文粹一百卷衢  
山精舍葉棻子實編富學堂魏齊賢仲賢校正每卷或析爲上  
下或上中下據前所列目實不止五百人舉其成數耳 觀劉

疎雨所藏徐天麟兩漢會要岳珂媿郟錄皆宋槧甚精胡安國  
春秋傳亦宋槧傳文比經低一格卷末有至正三年後丁丑秋  
八月七日陳留邊子昂手整于姑蘇鄧明仲家塾墨跡如新又  
元槧周禮義疏十二卷每卷首題吳興後學陳友仁君復編其  
第十二卷則俞廷椿周禮復古編也據友仁序本不知姓名者  
所作乃以己名置卷端蓋俗儒好名之弊也又中興禦侮錄無  
撰人襄陽守城錄趙萬年撰皆鈔本

張封藝圃雜記吾師沈辛齋先生升嶠嘉慶九年患疴夢一青  
衣者引至一處見長髯老人如世所塑判官象延之入分寶主  
禮坐回顧青衣者曰誤矣此歸安沈某非德清沈某也然既至  
此且少憩而去談次論及不茹葷血是法門戒律儒者不信宜

也然逢大士齋期及父母忌日本身生日儒者亦宜持齋並宜誦心經大悲呪往生呪婦女亦能如是遠勝於入廟燒香也師問尚有陽壽幾何老人不對惟曰子無大過惟好作綺語亦戕福之斧也師病痊後每以勿作綺語戒吾同門

嚴元照悔庵學文復楊傳九書孟秋廿日奉所惠書正當佗際之時發函伸紙隔爽眼明比想高堂健飮膝下承歡不匱之孝令人生感如弟有六十老親須髯蕭衰齒牙零落頽然如大耋之年而不能侍奉起居無故挈其妻若子二千里水陸長征遺吾父以思子之勞每讀昌黎歐陽詹哀詞舍朝夕之養而來京師云云未嘗不爲之撫膺歎息嗟乎如弟者何所爲而來此此間風物藝器外一無所有亦惟有新出之瓷絕無古品也弟心

境殊惡寢食不安張佩蔥先生集未曾寫得一紙經義考亦無

心細閱惟將宋本隋書檢點一過所補者具吾兄大同小異隋

書錢景開所託售者故攜之行篋中也畧來書言毘陵有謝承

後漢書姑蘇有韻海鑑源不知此說何自得之謝書據吳淑進

事類賦表明言其亡是北宋初已無其書故宋史藝文志亦不

載閣百詩述傳青主言其家有永樂中揚州刻本遭亂失去明

季有人在史館見方從哲以內府藏本攜歸德清後訪之方氏

後人不可得此二說均不足信前詔徵遺書范氏天一閣書單

列其目而實無其書故書終不出姚之駟後漢書補逸采集謝

書僅一千餘字耳今云四十餘卷不敢信也韻海鑑源元三百

六十卷崇文總目宋藝文志皆作十六卷殆是後來刪本據困

學紀聞則十六卷亦已失傳今云七大冊豈十六卷尙未亡歟  
 吾兄之說書得毋東坡所云說龍肉耶徐宏祖之於地理出自  
 目驗宜非按圖指索者比承教論河源主遊記以正東樵之誤  
 甚善但弟於斯道夙未究心他日歸當面請益也涼風至矣歸  
 思彌切良覲匪遙先此奉復吾兄上有兩親下無子息千鈞之  
 重繫此一身其勉自愛哉弟元照拜白

阮元定香亭筆談歸安楊鳳苞予初見其西湖秋柳詩以為才  
 士也繼至吳興鳳苞以經解入試于先儒之說剖析原委甚為  
 精核尤深于音韻之學

程鼎讀書堂記銅印長歌小序白華鮑君於南潯鎮上見古銅  
 印章方逾寸許鐫讀書堂記四字以青蚨一貫得之質之博古

者云是坡公舊物為弇州王氏所藏慶雲按程鼎仁和諸生官南河知縣著無說詩齋吟稿鮑君得此印後乞趙次閑繪圖徵題詩文至五十餘家曾在上海市上見之

南潯志卷五十七終



